

MESYUARAT KETIGA, PENGGAJ KETIGA
PARLIMEN KEEMPAT BELAS
2020

HARI SELASA : 15 DISEMBER 2020

**JAWAPAN-JAWAPAN BAGI PERTANYAAN-PERTANYAAN JAWAB
LISAN YANG TIDAK DIJAWAB DI DALAM DEWAN
(SOALAN NO. 8 HINGGA NO. 57)**

NOTA: [RUJUK PENYATA RASMI HARIAN (HANSARD)]

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : TUAN MUHAMMAD BAKHTIAR BIN WAN CHIK
[BALIK PULAU]**

TARIKH : 15 DISEMBER 2020 [SELASA]

SOALAN

Minta **MENTERI PERUMAHAN DAN KERAJAAN TEMPATAN** menyatakan menjelaskan polisi Kementerian dalam membantu golongan B40 memiliki rumah oleh syarikat-syarikat pemaju gergasi seperti Eco World.

JAWAPAN

Tuan Yang di-Pertua,

1. Untuk makluman Yang Berhormat, polisi/dasar Kementerian Perumahan dan Kerajaan Tempatan (KPKT) dalam membantu golongan B40 memiliki rumah adalah melalui Dasar Perumahan Negara (DRN) 2018-2025 dan Dasar Perumahan Mampu Milik Negara. Kedua-dua dasar ini telah menggariskan panduan serta pelan tindakan dalam meningkatkan penyediaan dan pemilikan rumah mampu milik terutamanya bagi kumpulan sasar iaitu B40 dan M40 termasuklah penyediaan perumahan mampu milik melalui kerjasama dengan pemaju swasta.

2. Program-program perumahan mampu milik sedia ada di bawah Kementerian ini seperti Program Perumahan Penjawat Awam (PPAM), Perumahan PR1MA dan Perumahan Syarikat Perumahan Negara Berhad (SPNB) telah memberi peluang kepada pemaju perumahan swasta untuk bekerjasama dengan Kerajaan bagi membangunkan perumahan mampu milik sama ada secara *joint venture* (JV), subsidi silang (*cross subsidi*) atau pertukaran tanah (*land swap*). Polisi ini merupakan dasar kerjasama awam-swasta (*public-private partnership*) yang melibatkan kerjasama pemaju swasta membina rumah dan dibiayai oleh peruntukan Kerajaan. Melalui kerjasama ini, rumah dapat dijual pada harga mampu milik iaitu lebih rendah daripada harga pasaran dan seterusnya meningkatkan peluang pemilikan kepada kumpulan B40 dan M40.

3. Kerajaan juga sentiasa bekerjasama dengan pihak pemaju untuk membantu rakyat terutamanya golongan B40 untuk memiliki rumah. Antara kerjasama yang telah dilaksanakan ialah Kempen Pemilikan Rumah (Home Ownership Campaign – HOC) anjuran Real Estate and Housing Developers' Association (REHDA) dan KPKT. Melalui program ini insentif Kerajaan diberikan melalui pengecualian duti setem dan insentif oleh pemaju perumahan diberikan melalui diskaun harga jualan sekurang-kurangnya 10%.

4. Kerajaan juga akan menyediakan skim *Rent-to-Own (RTO)* dengan kerjasama institusi kewangan terpilih untuk membantu rakyat memiliki rumah PR1MA.

5. Selain itu, pada tahun ini juga, Kementerian bercadang untuk melaksanakan pembangunan perumahan mampu milik secara tender terbuka (*Request for Proposal*) kepada semua pemaju hartanah yang berminat. Kos pembangunan akan ditanggung sepenuhnya oleh pihak pemaju tanpa melibatkan peruntukan Kerajaan dengan rumah dibina di atas tanah yang akan disediakan oleh Kerajaan. Melalui kaedah ini, mana-mana pemaju yang berminat boleh mengemukakan cadangan bagi membangunkan rumah mampu milik agar lebih *cost effective*. Dasar ini juga dilihat sebagai satu langkah Kerajaan untuk melibatkan pemaju-pemaju swasta gergasi yang stabil dari sudut kewangan untuk bersaing secara sihat serta menawarkan cadangan pembangunan rumah mampu milik yang terbaik kepada Kerajaan dan seterusnya meningkatkan penyediaan dan pemilikan rumah kepada kumpulan sasaran.

Sekian, terima kasih.

**MESYUARAT KETIGA, PENGGAL KETIGA,
PARLIMEN KEEMPAT BELAS
PEMBERITAHUAN PERTANYAAN
DEWAN RAKYAT MALAYSIA**

PERTANYAAN : JAWAB LISAN

**DARIPADA : DATO' SRI HAJI TAJUDDIN BIN ABDUL
RAHMAN [PASIR SALAK]**

TARIKH : 15 DISEMBER 2020 (SELASA)

SOALAN

minta **MENTERI PEMBANGUNAN LUAR BANDAR** menyatakan status Kolej Felcra Changkat Lada, jumlah pelajar sekarang dan perancangan untuk membina kampus tetap di Changkat Lada, Seberang Perak.

JAWAPAN

Tuan Yang di-Pertua,

Kolej FELCRA telah ditubuhkan pada 25 Mei 2012 di bawah FELCRA Education Services Sdn. Bhd. iaitu anak syarikat milik penuh FELCRA BERHAD. Kolej FELCRA (kampus sementara) terletak di Bandar Baru Seberang Perak, Kampung Gajah, Perak Darul Ridzuan dan mempunyai keluasan 75,068 meter persegi.

Penubuhan Kolej FELCRA juga adalah untuk memberi peluang serta menyediakan tempat untuk anak-anak Warga FELCRA Berhad khususnya dan masyarakat Luar Bandar amnya untuk mendapatkan latihan dan kemahiran di peringkat Sijil dan Diploma supaya generasi kedua FELCRA Berhad akan lebih berdaya saing.

Kampus sementara yang terletak di Seberang Perak ini mampu menampung kapasiti pelajar seramai 800 orang. Namun, sehingga kini, enrolmen pelajar adalah seramai 350 orang.

FELCRA telah merancang untuk memajukan kawasan seluas 634,470 meter persegi untuk pembinaan kampus tetap Kolej Universiti FELCRA yang terletak di Seberang Perak dan dijangkakan perancangan ini dapat dicapai selewatnya pada tahun 2025 tertakluk kepada kajian kesesuaian dan kelestarian projek tersebut.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KE TIGA, PENGGAL KE TIGA,
PARLIMEN KEEMPATBELAS**

PERTANYAAN : JAWAB LISAN

DARIPADA : YB PUAN WONG SHU QI (KLUANG)

TARIKH : 15 DISEMBER 2020 (SELASA)

SOALAN

PUAN WONG SHU QI [KLUANG] minta **MENTERI DALAM NEGERI** menyatakan menjelaskan apa rancangan jangka masa pendek dan panjang untuk mengurangkan kepadatan banduan di semua penjara untuk membendung penularan penyakit berjangkit.

JAWAPAN

Tuan Yang Di Pertua,

Untuk makluman Ahli Yang Berhormat, bagi menangani masalah kesesakan atau kepadatan penghuni di dalam penjara, Jabatan Penjara Malaysia bukan sahaja telah mengambil pendekatan pembinaan blok tambahan di beberapa institusi penjara sedia ada malah beberapa langkah proaktif turut diambil untuk menangani masalah kesesakan serta membendung penularan penyakit-berjangkit. Antaranya adalah:

- i. Mempergiatkan pelaksanaan Sistem Parol, Perintah Kehadiran Wajib dan Pusat Pemulihan Pemasyarakatan yang mana sehingga kini telah melibatkan seramai 56,247 orang yang telah dan sedang menjalani pemulihan di luar penjara;
- ii. Jabatan Penjara Malaysia juga telah mula melaksanakan ketetapan berasaskan pindaan kepada Peraturan 111(1), Peraturan-Peraturan Penjara 2000 melalui program Pelepasan Banduan Secara Lesen (PBSL) untuk banduan yang mana hukumannya kurang dari setahun. Melalui program tersebut, banduan yang memenuhi syarat pemilihan boleh mengikuti program seperti program latihan pekerjaan di sektor perkilangan, pembuatan, pembinaan, perkhidmatan dan pertanian. Lembaga Pembebasan Banduan Secara Lesen yang ditubuhkan oleh Jabatan Penjara Malaysia, telah melibatkan keahlian daripada pihak luar selain daripada penglibatan pihak Jabatan Penjara Malaysia. Melalui mesyuarat pertamanya pada awal Oktober 2020, Lembaga PBSL telah menilai laporan untuk 1,200 banduan yang layak dan telah mengesyorkan kepada Komisioner Jeneral Penjara sejumlah banduan yang wajar diberikan pelepasan banduan secara lesen. Pada ketika ini terdapat sekitar 11,000 banduan yang sedang menjalani hukuman pemenjaraan kurang dari setahun;
- iii. Memperkemaskan lagi latihan kemahiran vokasional, latihan bersijil serta sistem latihan pekerjaan di dalam penjara bagi membolehkan

banduan yang layak, dipertimbangkan untuk mengikuti program pekerjaan dan program Reintegrasi Penghuni Industri. Peluang pekerjaan adalah antara faktor utama yang mampu membendung pengulangan kes jenayah dan residivis;

- iv. Mengubahsuai penjara sedia ada bagi meningkatkan kapasiti;
- v. Menjalinkan kerjasama dengan pihak Mahkamah dan Jabatan Imigresen Malaysia (JIM) bagi mempercepatkan proses penghantaran pulang banduan warga asing yang telah selesai menjalani hukuman;
- vi. Meneliti keperluan pindaan perundangan berkaitan cadangan penyahjenayahan kesalahan penyalahgunaan dadah serta dasar pengalihan penyalahgunaan dadah dari hukuman penjara ke program rawatan dan pemulihan selaras dengan keputusan Mesyuarat Jawatankuasa Bertindak Penguatkuasaan Undang-undang pada 21 Julai 2020. Akta baharu yang dicadangkan dan akan dikenali sebagai Akta Penyalahgunaan Dadah dan *Substance* bagi menggantikan Akta Penagih Dadah (Rawatan dan Pemulihan) 1983 sedang diperhalusi. Cadangan pindaan ini mempunyai kaitan dengan statistik banduan sabitan di bawah Seksyen 15 (1) Akta Dadah Berbahaya 1952 berjumlah 4,075 banduan di seluruh penjara di Malaysia;
- vii. Menjadikan kem PLKN sebagai *admission prison* bagi penempatan banduan sabitan dan reman bagi kategori keselamatan minima; dan
- viii. Cadangan yang melibatkan *Probation* dan *Community Correction* yang melibatkan beberapa alternatif kepada hukuman pemenjaraan sedang dalam penilaian oleh Agensi yang berkaitan dengan perundangan. Jika dipersetujui tatacara pelaksanaan yang melibatkan syarat dan prosedur operasi standard (SOP) akan disediakan oleh Jabatan Penjara Malaysia.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : JAWAB LISAN

**DARIPADA : YB DATUK WILSON UGAK ANAK
KUMBONG [HULU RAJANG]**

TARIKH : 15 DISEMBER 2020 (SELASA)

SOALAN

DATUK WILSON UGAK ANAK KUMBONG [HULU RAJANG] minta **MENTERI KOMUNIKASI DAN MULTIMEDIA** menyatakan sekiranya pihak Kementerian bercadang untuk menaik taraf semua menara-menara komunikasi di kawasan Parlimen Hulu Rajang kepada 4G.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian sentiasa memberi tumpuan kepada penambahbaikan infrastruktur komunikasi melalui penyediaan liputan jalur lebar berkelajuan tinggi dengan menggunakan pelbagai teknologi. Ini adalah untuk membolehkan rakyat terutamanya di negeri Sabah dan Sarawak dapat menikmati akses kepada perkhidmatan jalur lebar berkelajuan tinggi yang lebih menyeluruh.

Melalui inisiatif pelan JENDELA, sebanyak 59 menara komunikasi baharu telah dirancang dan sebanyak 33 alat pemancar komunikasi di menara sedia ada akan dinaik taraf dengan perkhidmatan 4G di kawasan Parlimen Hulu Rajang.

Selain itu, sebanyak 118 pelanggan bagi jalur lebar talian tetap akan dinaik taraf daripada perkhidmatan rangkaian berasaskan tembaga kepada rangkaian gentian optik dan dijangka siap secara berperingkat menjelang akhir tahun 2021. Jumlah ini dijangka akan diselaraskan dari semasa ke semasa disebabkan oleh faktor peralihan langganan pelanggan.

Walau bagaimanapun, usaha bagi meningkatkan liputan dan kualiti perkhidmatan jalur lebar di seluruh negara terutamanya di kawasan luar bandar dan pedalaman bukan sahaja melibatkan kerajaan persekutuan malah memerlukan kerjasama pelbagai pihak, termasuk di peringkat kerajaan negeri dan pihak berkuasa tempatan untuk memudahkan proses-proses perolehan dan kelulusan tapak yang terlibat.

Sehubungan dengan itu, bagi menjayakan inisiatif-inisiatif menerusi pelan JENDELA ini, Kementerian berharap agar mendapat sokongan padu dan kerjasama Kerajaan Negeri, pihak Kementerian dan agensi yang berkaitan agar rakyat dapat menikmati manfaatnya.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA PENGGAL KETIGA
PARLIMEN KEEMPAT BELAS**

PERTANYAAN : LISAN

DARIPADA : TUAN FONG KUI LUN [BUKIT BINTANG]

TARIKH : 15 DISEMBER 2020 (SELASA)

SOALAN

TUAN FONG KUI LUN [BUKIT BINTANG] minta **MENTERI WILAYAH PERSEKUTUAN** menyatakan :-

- (a) apakah input yang Dewan Bandaraya Kuala Lumpur dapat daripada orang awam berhubung bantahan awam ke atas Deraf Pelan Struktur Kuala Lumpur 2040 yang dipamerkan sebelum ini; dan
- (b) apakah pindaan deraf yang bakal dicadangkan untuk dimasukkan.

JAWAPAN

Tuan Yang Di Pertua,

Untuk makluman Yang Berhormat Bukit Bintang, Jawatankuasa Pendengaran Pandangan Awam (JKPPA) telah menjalankan pendengaran pandangan awam pada 23 Jun 2020 hingga 27 Julai 2020 untuk mendengar sejumlah 1,414 pandangan awam yang diterima melalui 488 borang pandangan awam yang dikemukakan.

Semua pandangan awam yang diterima dibahagikan kepada 2 kategori pengesyoran iaitu pandangan yang berkaitan Draf Pelan Struktur Kuala Lumpur 2040 (PSKL2040) dan tidak berkaitan Draf PSKL2040.

Sejumlah 1,043 (74%) pandangan awam diterima adalah berkaitan dengan Draf PSKL2040. Manakala, sejumlah 371 pandangan awam yang tidak berkaitan dengan PSKL2040 akan diambil tindakan berasingan di bawah aspek pengurusan dan penguatkuasaan DBKL.

Jawapan (a)

Berikut adalah antara perkara/isu berkaitan Draf PSKL2040 yang kerap dibangkitkan melalui pandangan awam, antaranya berkaitan:

- 1) Tiada definisi jelas dalam mencapai sasaran nisbah tanah lapang dan penduduk 2040 iaitu seluas 20-meter persegi seorang. Perlu diperhalusi dalam konteks akta 267 berhubung maksud tanah lapang dan kaitan dengan maksud kawasan lapang dan kawasan hijau;
- 2) Pandangan berkaitan isu pewartaan Bukit Persekutuan sebagai rizab hutan bandar;
- 3) Pandangan berkaitan Bukit Dinding dijadikan taman awam dengan hierarki Taman Daerah;

- 4) Pandangan berkaitan mengekalkan kawasan perkuburan Kwong Tong sebagai tapak warisan;
- 5) Pandangan berkenaan jajaran rel awam yang merentasi kawasan kediaman stabil untuk tidak membelah dua kawasan kejiranan sedia ada;
- 6) Pandangan berkaitan bentuk dan kandungan Draf PSKL2040 seperti berikut:
 - Penambahbaikan pernyataan dasar bagi semua Matlamat di dalam Draf PSKL2040 agar lebih mudah difahami; dan
 - Keperluan Draf PSKL2040 menyediakan unjuran penduduk siang hari (day population), unjuran luas lantai perdagangan, perumahan, perindustrian, kemudahan masyarakat, pelancongan dan pekerjaan.

Jawapan (b)

Datuk Bandar telah menimbang Lembaga Pendengaran Pandangan Awam (LPPA) dan bersetuju agar Draf PSKL2040 dibuat beberapa pindaan selaras dengan peruntukan seksyen 7(7), Akta 267 dengan mengambilkira cadangan penambahbaikan berdasarkan LPPA, pandangan daripada jabatan dalaman DBKL, Kementerian Wilayah Persekutuan dan lain-lain agensi kerajaan sebelum dikemukakan kepada YB Menteri.

Pindaan yang dibuat juga akan melibatkan keseluruhan kandungan mengikut bab dan matlamat di dalam Draf PSKL2040 seperti menyemak semula dan memperincikan pernyataan halatuju strategik dan tindakan bagi setiap matlamat, pembetulan kepada data-data dan maklumat bagi memastikan ketepatannya.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : TUAN HAJI WAN HASSAN BIN MOHD RAMLI
[DUNGUN]**

TARIKH : 15 DISEMBER 2020 (SELASA)

SOALAN

TUAN HAJI WAN HASSAN BIN MOHD RAMLI [DUNGUN] minta **MENTERI ALAM SEKITAR DAN AIR** menyatakan bilakah projek pemecah ombak di muara Sungai Dungun akan dilaksanakan, ini kerana berdasarkan kesulitan bot-bot nelayan keluar masuk terutama pada musim tengkujuh yang boleh mengakibatkan kemalangan nyawa.

JAWAPAN

Tuan Yang Di-Pertua,

1. Kementerian mengambil perhatian yang serius terhadap kesulitan yang dialami oleh lebih kurang 600 bot-bot nelayan keluar masuk terutama pada musim tengkujuh di muara Sungai Dungun.
2. Untuk makluman Ahli Yang Berhormat, Projek Pemuliharaan Muara Sungai Dungun ini dalam peringkat kerja rekabentuk terperinci. Projek ini melibatkan antara lainnya cadangan pembinaan pemecah ombak dan pengorekan muara.
3. Rekabentuk terperinci ini akan mengambil masa selama 18 bulan untuk disiapkan dan kerja-kerja fizikal dijangka akan dapat dimulakan pada akhir tahun 2022.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : DATO' ABDULLAH SANI BIN ABDUL
HAMID [KAPAR]**

TARIKH : 15 DISEMBER 2020 (SELASA)

SOALAN

DATO' ABDULLAH SANI BIN ABDUL HAMID [KAPAR] minta **MENTERI KOMUNIKASI DAN MULTIMEDIA** menyatakan komitmen dalam mencegah aktiviti penipuan (*scam*) dan perjudian secara atas talian.

JAWAPAN

Tuan Yang di-Pertua,

Untuk makluman Ahli Yang Berhormat, kegiatan penipuan ataupun 'scam' sama ada secara dalam talian (*online*) ataupun luar talian (*offline*) tertakluk di bawah bidang kuasa pihak Polis Diraja Malaysia (PDRM), Kementerian Perdagangan Dalam Negeri dan Hal Ehwal Pengguna (KPDNHEP), Suruhanjaya Sekuriti (SC), Bank Negara Malaysia (BNM) atau agensi-agensi berkenaan; tertakluk kepada bentuk-bentuk penipuan yang dijalankan.

Namun, dari tahun 2018 hingga September 2020, Kementerian telah menerima sejumlah **3,595** aduan awam berkaitan aktiviti berunsur penipuan, yang seterusnya dirujuk kepada agensi-agensi penguatkuasaan yang berkaitan seperti pihak PDRM, KPDNHEP, SC atau BNM untuk perhatian dan tindakan lanjut di bawah bidang kuasa mereka.

Dalam tempoh yang sama, **1,588** laman palsu yang dikenali sebagai laman “*Phishing*” telah disekat di bawah Akta Komunikasi dan Multimedia (AKM) 1998 melalui usahasama pemantauan institusi-institusi perbankan yang terlibat dalam *Internet Banking Task Force* (IBTF) yang diketuai oleh BNM.

Bagi perkara berkaitan siasatan, “Jawatankuasa Jenayah Siber PDRM-MCMC” yang telah ditubuhkan akan terus diperkasakan bagi menerajui gerak kerja dan tindakan yang lebih strategik dan tersusun antara PDRM dan Suruhanjaya Komunikasi dan Multimedia Malaysia (SKMM), termasuklah bagi perkara melibatkan isu kesalahan jenayah siber termasuklah berkaitan penipuan atau *scam*. Kerjasama kedua-dua pihak khususnya dalam perkongsian maklumat dan kepakaran adalah bertepatan bagi melancarkan aktiviti penguatkuasaan bagi menangani isu penyalahgunaan media sosial dengan lebih efektif. Aduan yang tidak dapat dikendalikan di peringkat SKMM akan dibawa kepada perbincangan bersama agensi-agensi lain.

Dari aspek pengawalseliaan industri, SKMM turut menjalankan audit pengesahan data dengan Jabatan Pendaftaran Negara (JPN) untuk mengesahkan integriti pangkalan data pelanggan talian telefon prabayar untuk memastikan bahawa semua nombor yang aktif disahkan dengan sewajarnya. Ini bagi mengelakkan data tersebut disalah guna oleh pihak yang tidak bertanggungjawab untuk tujuan penipuan dan seumpamanya.

Sehingga Oktober 2020, sebanyak 1,377,862 talian prabayar yang didaftar secara meragukan telah dikesan. Daripada jumlah tersebut, sebanyak 920,217 talian telah ditamatkan perkhidmatannya dan 457,645 telah dikemas kini dengan maklumat yang sah.

Selain tindakan berbentuk penguatkuasaan dan pengawalseliaan industri, pihak Kementerian turut memberi keutamaan terhadap usaha meningkatkan kesedaran orang ramai berhubung penipuan dalam talian. Bagi tujuan tersebut, pihak SKMM menggerakkan program-program advokasi pengguna menerusi kempen-kempen kesedaran di seluruh negara, serta melalui hebahan media massa bagi memupuk kesedaran

dan kewaspadaan orang ramai termasuk golongan muda dan kanak-kanak berkenaan risiko dan modus operandi penipuan dalam talian. KKMM turut memberi kerjasama dengan mengaturkan siri temu bual menerusi rancangan bual bicara di televisyen, radio mahupun sesi webinar yang menampilkan wakil daripada BNM, PDRM dan SKMM sendiri.

Untuk makluman Ahli Yang Berhormat, kegiatan judi dalam talian tertakluk di bawah Akta Rumah Perjudian Terbuka 1953, di bawah bidang kuasa Polis Diraja Malaysia (PDRM).

Antara tahun 2018 sehingga September 2020, sejumlah **1,010** laman web judi dalam talian telah disekat berdasarkan permohonan rasmi pihak PDRM, atas kesalahan di bawah Akta Rumah Perjudian Terbuka 1953. Usaha ini akan dijalankan secara berterusan dari semasa ke semasa. Langkah ini diambil berlandaskan permohonan daripada PDRM, serta maklumat dan aduan yang diterima daripada masyarakat awam.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : DATO' SYED ABU HUSSIN BIN HAFIZ SYED
ABDUL FASAL [BUKIT GANTANG]**

TARIKH : 15 DISEMBER 2020 [SELASA]

SOALAN

Minta **MENTERI PERUMAHAN DAN KERAJAAN TEMPATAN** menyatakan kedudukan mula kerja dan pelaksanaan bagi pembinaan Balai Bomba Trong di Pekan Trong, Parlimen Bukit Gantang. Maklumat yang diterima, Kementerian Kewangan telahpun meluluskan peruntukan ini.

JAWAPAN

Tuan Yang di-Pertua,

1. Untuk makluman Yang Berhormat, Projek Balai Bomba dan Penyelamat Trong, Perak (Kategori D) telah diluluskan dalam RMKe-11 Rolling Plan Kedua (RP2) Tahun 2017 dengan kos projek RM3.675 juta.
2. Surat Setuju Terima (SST) projek telah dikeluarkan oleh Jabatan Kerja Raya (JKR) kepada petender yang berjaya pada 15 Oktober 2020. Pembinaan projek telah bermula pada 28 Oktober 2020 dan akan tamat pada 15 Mac 2022.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KE TIGA, PENGGAL KE TIGA,
PARLIMEN KEEMPATBELAS**

PERTANYAAN : JAWAB LISAN

DARIPADA : YB TUAN GOBIND SINGH DEO (PUCHONG)

TARIKH : 15 DISEMBER 2020 (SELASA)

SOALAN

TUAN GOBIND SINGH DEO [PUCHONG] minta **MENTERI DALAM NEGERI** menyatakan berapakah kes COVID-19 di penjara-penjara Malaysia dan apakah tindakan Kerajaan untuk mengatasi kes-kes tersebut serta memastikan keselamatan tahanan-tahanan dan juga pegawai-pegawai penjara serta polis dan semua pihak lain yang terlibat dalam urusan penjara.

JAWAPAN

Tuan Yang Di Pertua,

Untuk makluman Ahli Yang Berhormat, beberapa institusi penjara terjejas akibat penularan wabak COVID-19. Statistik Jabatan Penjara Malaysia sehingga 03 November 2020 menunjukkan seramai 1,160 banduan telah disahkan positif COVID-19. Manakala bagi kes anggota dan keluarga anggota pula, pada tarikh tersebut seramai 125 orang disahkan positif.

Bagi membendung masalah ini, Jabatan Penjara Malaysia telah mengambil dan mengikuti segala SOP yang telah ditetapkan oleh Kementerian Kesihatan Malaysia (KKM) untuk merawat, melaksanakan kuarantin dan mencegah penularan wabak tersebut kepada banduan dan kakitangan.

SOALAN NO : 16

Jabatan Penjara Malaysia turut mempunyai perintah tetap jabatan yang antaranya menetapkan agar semua banduan sebelum diterima masuk ke penjara, perlu mempunyai keputusan ujian saringan COVID-19. Perintah tetap ini selaras dengan keputusan sidang khas Majlis Keselamatan Negara pada 15 Oktober 2020 yang telah bersetuju agar dilaksanakan ujian pengesanan COVID-19 kepada semua banduan semasa kemasukan bagi memastikan penularan COVID-19 di penjara dapat dicegah sepenuhnya.

Pelbagai usaha telah dilaksanakan oleh Jabatan Penjara Malaysia melalui Kementerian Dalam Negeri (KDN) dengan kerjasama KKM dalam memastikan penularan wabak ini adalah terkawal dalam komuniti penjara.

Jabatan Penjara Malaysia bersama dengan KDN sedang dalam proses memuktamadkan cadangan penempatan banduan sabitan dan reman kategori risiko keselamatan minimum di beberapa bekas kem Pusat Latihan Khidmat Negara (PLKN) yang akan diwartakan sebagai penjara sementara di bawah seksyen 8 Akta Penjara 1995 dan berfungsi sebagai *admission prison*.

Bagi tujuan yang sama iaitu mengurangkan tahap kebolehjangkitan, Jabatan Penjara Malaysia telah mewujudkan pusat-pusat transit di institusi penjara untuk penempatan banduan yang boleh diterima masuk ke institusi tersebut dengan mengambil kira keperluan pengasingan berdasarkan tarikh-tarikh kemasukan. Selaras dengan hala tuju Jabatan Penjara Malaysia iaitu dua pertiga banduan sabitan yang layak akan menjalani pemulihan di luar penjara, langkah-langkah pengurangan kesesakan melalui pelaksanaan dan pemerkasaan sistem parol, perintah kehadiran wajib, program integrasi penghuni industri, program *corporate smart internship* dan pelepasan banduan secara lesen. Ini akan dilaksanakan berterusan dengan itu dapat menjangka akan mengurangkan kesesakan dan juga kita dapat mengekang penularan wabak COVID-19 di dalam penjara.

Pada masa yang sama bagi memastikan keselamatan banduan dan tahanan serta anggota penjara, polis dan semua anggota penguatkuasa lain yang terlibat dalam urusan penahanan, Jabatan Penjara Malaysia turut mengeluarkan dua SOP seperti berikut:

1. *Standard Operating Procedure (SOP) Penerimaan Banduan Semasa COVID-19*

Aspek yang diberikan penekanan dalam SOP ini adalah:

- i. Proses penerimaan banduan yang melibatkan semakan waran, saringan kesihatan, banduan kebersihan diri (*mandi*) dan penjarakan fizikal.
- ii. Pendaftaran banduan yang perlu dilaksanakan dengan penjarakan fizikal, pemakaian *PPE*, *face shield*, *face mask*, sarung tangan dan mengelakkan sentuhan kecuali diperlukan.
- iii. Ruang penempatan kuarantin yang mempunyai 14 dormitori yang mencukupi bagi memastikan pengasingan berdasarkan kemasukan harian, tiada percampuran dengan banduan dari dormitori lain, pengosongan dan nyahkuman dormitori termasuk tatacara penggunaan tandas.
- iv. Keperluan saringan COVID-19 dan tatacara penamatan tempoh kuarantin.

2. *Standard Operating Procedure (SOP) Pengiringan Banduan Semasa COVID-19*

SOP ini merangkumi pengiringan ke hospital, pengiringan ke mahkamah dan pengiringan pemindahan banduan, di mana antara kandungan utamanya adalah seperti berikut:

- i. Sebelum Pengiringan Banduan yang melibatkan pemeriksaan kesihatan terhadap pegawai pengiring dan banduan, nyahkuman peralatan keselamatan dan kenderaan serta bekalan peralatan lain termasuk sarung tangan, pelitup muka dan cecair sanitasi (*hand sanitizer*)

SOALAN NO : 16

- ii. Semasa pengiringan yang melibatkan penjarakan fizikal dan pemakaian penutup muka oleh banduan dan anggota pengiring.
- iii. Selepas Pengiringan langkah yang digunakan kembali tertakluk kepada SOP Penerimaan Banduan.
- iv. Penjelasan berhubung perkara-perkara lain yang dibenarkan dan tidak dibenarkan penggunaan gari, pelitup muka, penggunaan kenderaan, penggunaan pegawai atau pembantu pegawai perubatan.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KE-14**

PERTANYAAN : LISAN

DARIPADA : TUAN AHMAD TARMIZI BIN SULAIMAN [SIK]

TARIKH : 15 DISEMBER 2020 (SELASA)

SOALAN

TUAN AHMAD TARMIZI BIN SULAIMAN [SIK] minta **MENTERI KEWANGAN** menyatakan adakah pihak Kerajaan bercadang untuk mempertimbangkan rebat/insentif pengecualian cukai korporat kepada Agensi/Pihak yang terlibat memajukan pembangunan tanah terbiar di luar bandar.

JAWAPAN

Yang Dipertua,

1. Untuk makluman Yang Berhormat, Kerajaan telah menyediakan pelbagai insentif dalam bentuk pengecualian cukai kepada pihak yang terlibat dalam memajukan pembangunan tanah. Melalui Bajet 2015, Kerajaan telah mengumumkan pakej galakan cukai bagi kawasan *Less Developed Areas* (LDA) yang bertujuan untuk memastikan pertumbuhan wilayah yang seimbang dan inklusif dengan mempromosikan pelaburan yang berterusan di LDA. Pakej insentif cukai yang disediakan yang masih diterima pakai adalah seperti berikut:-

- i. pengecualian cukai pendapatan sebanyak 100% bagi tempoh sehingga 15 tahun (5+5+5) **atau** pengecualian cukai pendapatan bersamaan Elaun Cukai Pelaburan sebanyak 100% ke atas perbelanjaan modal yang layak yang dilakukan dalam tempoh 10 tahun;
- ii. pengecualian duti setem ke atas suratcara pindah milik/ pajakan tanah/ bangunan yang digunakan bagi tujuan projek perkilangan dan perkhidmatan;
- iii. pengecualian duti import dan cukai jualan ke atas bahan mentah, komponen, mesin dan peralatan yang digunakan secara langsung dalam aktiviti syarikat; dan
- iv. pengecualian cukai pegangan ke atas fi teknikal, perkhidmatan dan royalti 31 Disember 2020.

2. Sejak insentif LDA ini diperkenalkan sehingga tahun 2020, sebanyak 20 projek telah diluluskan dengan jumlah pelaburan sebanyak RM6 billion.

3. Bagi menarik dan menggalakkan penglibatan pemaju hartanah dan syarikat swasta dalam membangunkan kawasan yang telah dikenal pasti di Kawasan seperti berikut:

- i. Iskandar Malaysia (Pembangunan di Selatan Johor);
 - ii. Wilayah Pembangunan Ekonomi Pantai Timur (Kelantan, Terengganu, Pahang dan Daerah Mersing, Johor);
 - iii. Pembangunan Ekonomi Koridor Utara (Perlis, Kedah, Pulau Pinang dan Perak); dan
 - iv. Koridor Pembangunan Sabah (SDC).
4. Sehubungan itu, Kerajaan telah menyediakan insentif bagi menggalakan pembangunan di atas seperti berikut:-
- i. Pengecualian cukai pendapatan sehingga 100% untuk tempoh sehingga 15 tahun;
 - ii. Elaun Cukai Pelaburan sehingga 100% dibenarkan ditolak sehingga 70% daripada pendapatan statutori untuk tempoh sehingga 10 tahun;
 - iii. Pengecualian ke atas perbelanjaan jualan eksport selama 5 tahun;
 - iv. Pengecualian duti import dan cukai jualan tertakluk kepada dasar semasa; dan
 - v. Pengecualian duti setem ke atas pengambilalihan tanah bagi tujuan pembangunan.

Sekian, terima kasih.

**PEMBERITAHU PERTANYAAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : TUAN SYED IBRAHIM BIN SYED NOH
[LEDANG]**

TARIKH : 15 DISEMBER 2020 (SELASA)

SOALAN

Minta **MENTERI PERTANIAN DAN INDUSTRI MAKANAN** menyatakan perincian pembiayaan sejumlah RM5 juta kepada 82 usahawan melalui Lembaga Pertubuhan Peladang dan perkembangan projek pembiayaan tersebut.

JAWAPAN

Tuan Yang di-Pertua,

1. Untuk makluman, Lembaga Pertubuhan Peladang (LPP) melalui Pertubuhan Peladang Kawasan telah menyediakan satu program pembiayaan mudah yang dikenali sebagai Tabung Pembangunan Usahaniaga Peladang (TPUP) melalui tawaran pembiayaan minima RM20,000 sehingga maksima RM100,000 dengan tempoh bayaran balik selama 7 tahun. Program ini terbuka kepada ahli peladang yang mengusahakan projek ekonomi berasaskan pertanian yang bertujuan membantu meningkatkan kapasiti pengeluaran dan pendapatan usahawan peladang.

2. Berdasarkan kepada pecahan peruntukan TPUP RMK-11 (2016-2020) dalam tempoh empat tahun pertama iaitu 2016-2019, sebanyak RM19,873,987.00 telah diluluskan kepada 326 usahawan peladang. Daripada jumlah tersebut, seramai 207 usahawan peladang telah berjaya meningkatkan pendapatan kepada RM4,000.00 dan ke atas sebulan serta dapat meningkatkan kapasiti projek sedia ada.

3. Pada tahun 2020, Kementerian Pertanian dan Industri Makanan telah memperuntukkan sejumlah RM5 juta kepada LPP bagi melaksanakan Program TPUP. Sehingga 30 November 2020, seramai 86 orang usahawan peladang telah diluluskan pembiayaan sebanyak RM5,000,000.00 dan daripada jumlah tersebut, 50 orang usahawan peladang disasarkan dapat meningkatkan pendapatan kepada RM4,000 dan ke atas sebulan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : DATO' HAJI MOHD. SALIM SHARIF
[JEMPOL]**

TARIKH : 15 DISEMBER 2020 (SELASA)

SOALAN

DATO' HAJI MOHD. SALIM SHARIF [JEMPOL] minta **MENTERI KOMUNIKASI DAN MULTIMEDIA** menyatakan sebarang mekanisme baharu untuk menyekat sindiket perjudian dalam talian bagi semua platform media sosial yang semakin berleluasa.

JAWAPAN

Tuan Yang di-Pertua,

Untuk makluman Ahli Yang Berhormat, kegiatan judi atas talian adalah tertakluk di bawah Akta Rumah Perjudian Terbuka 1953, di bawah bidang kuasa Polis Diraja Malaysia (PDRM).

Namun demikian, kerjasama antara pihak Suruhanjaya Komunikasi dan Multimedia Malaysia (SKMM) dan Polis Diraja Malaysia (PDRM) telah sedia terjalin di dalam membanteras kegiatan judi atas talian, meliputi aspek-aspek kerjasama perkongsian maklumat, forensik digital, penamatan nombor-nombor telefon dan sekatan laman-laman web judi atas talian. Usaha sekatan ke atas laman-laman web judi dalam talian ini akan dijalankan secara berterusan dari semasa ke semasa berlandaskan permohonan daripada PDRM serta maklumat dan aduan yang diterima daripada masyarakat awam.

Daripada aspek pengawalseliaan industri, SKMM turut menjalankan audit pengesahan data dengan Jabatan Pendaftaran Negara (JPN) untuk mengesahkan integriti pangkalan data pelanggan talian telefon prabayar untuk memastikan bahawa semua nombor yang aktif disahkan dengan sewajarnya. Ini bagi mengelakkan ianya disalahguna oleh pihak yang tidak bertanggungjawab untuk tujuan penipuan dan seumpamanya.

Antara tahun 2018 sehingga September 2020, sejumlah **1,010** laman-laman web judi atas talian telah disekat berdasarkan permohonan rasmi pihak PDRM, atas kesalahan di bawah Akta Rumah Perjudian Terbuka 1953. Usaha ini akan dijalankan secara berterusan dari masa ke semasa. Langkah ini diambil berlandaskan permohonan daripada PDRM, serta maklumat dan aduan yang diterima daripada masyarakat awam

Sehingga Oktober 2020, sebanyak 1,377,862 talian prabayar yang didaftar secara meragukan telah dikesan. Daripada jumlah tersebut, sebanyak 920,217 talian telah ditamatkan perkhidmatannya dan 457,645 telah dikemaskini dengan maklumat yang sahih.

Kegiatan judi dalam talian secara top-up melalui telefon adalah taktik terbaharu kaki judi melepaskan ketagihan bermain judi selepas premis judi menutup operasi mereka. Modus operandi mereka mengenal pasti premis menjual top-up telefon bimbit, kemudiannya berkunjung ke premis terbabit dan berpura-pura menambah nilai kad prabayar telefon bimbit. Peniaga akan menambah nilai kad prabayar nombor telefon kaki judi tersebut dengan menggunakan ID dan kata kunci pengenalan (*password*) tertentu. Secara khusus mengenai aktiviti ini, pihak SKMM akan membantu aktiviti penguatkuasaan yang dijalankan oleh pihak PDRM mengikut keperluan.

**PEMBERITAHUAN PERTANYAAN LISAN DEWAN RAKYAT
PENGAL KETIGA, MESYUARAT KETIGA,
DEWAN RAKYAT YANG KEEMPAT BELAS TAHUN 2020**

PERTANYAAN : LISAN

DARIPADA : TUAN M. KULASEGARAN [IPOH BARAT]

TARIKH : 15 DISEMBER 2020

SOALAN

**TUAN M. KULASEGARAN [IPOH BARAT] minta MENTERI
SUMBER MANUSIA menyatakan**

- (a) Adakah benar bahawa Pembangunan Sumber Manusia Berhad (PSMB) akan menjual bangunan mereka di Bukit Damansara dan membeli bangunan baru di tempat yang lain; dan
- (b) Adakah kajian telah dilakukan untuk memastikan ini adalah keputusan yang tepat.

JAWAPAN

Tuan Yang di-Pertua,

Untuk makluman Ahli Yang Berhormat,

1. Bagi memastikan segala keperluan dan operasi syarikat bergerak seiring dengan perkembangan semasa, Pembangunan Sumber Manusia Berhad (PSMB) sedang membuat kajian perbandingan (*benchmarking*) dengan beberapa negara maju dan negara serantau. Kajian perbandingan dengan badan seumpama PSMB di negara lain serta keperluan- keperluan badan kemahiran latihan seumpamanya sedang dijalankan bagi memastikan PSMB mempunyai kelengkapan dan fasiliti bertaraf antarabangsa. Kelengkapan fasiliti yang dimaksudkan adalah seperti bilik latihan, bilik asrama dan bilik makmal keperluan IR4.0. Ini adalah sejajar dengan peranan PSMB sebagai sebuah institusi pemegang amanah yang diberikan mandat oleh Kerajaan Malaysia untuk menjadi pemangkin kepada pembangunan tenaga kerja tempatan yang berwibawa dengan peranan makro PSMB dalam memastikan pembangunan modal insan tempatan yang berkualiti melalui program pensijilan latihan berkemahiran tinggi yang cekap.
2. Sebarang keputusan dibuat akan berdasarkan keperluan dan untuk mengurangkan kos operasi bagi pihak PSMB dan kumpulan sasarannya serta pihak berkepentingan yang berkaitan. Buat masa ini, belum ada sebarang keputusan dibuat memandangkan kajian masih sedang berjalan. Keputusan untuk membeli atau menjual sebarang aset hanya akan dibuat setelah selesai proses kajian serta penilaian dari semua sudut pro dan kontra telah diambil kira.
3. Pada masa ini, bangunan Pembangunan Sumber Manusia Berhad (PSMB) di Bukit Damansara tidak dijual dan operasi masih berjalan seperti biasa.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KE EMPAT BELAS**

PERTANYAAN : LISAN

**DARIPADA : DATUK HAJI AHMAD JAZLAN BIN YAAKUB
[MACHANG]**

TARIKH : 15 DISEMBER 2020 (SELASA)

SOALAN

Minta **MENTERI PERTANIAN DAN INDUSTRI MAKANAN** menyatakan adakah Kementerian bercadang untuk memberi bantuan khas kepada petani-petani dan nelayan bagi membantu golongan ini yang terjejas akibat daripada penularan pandemik COVID-19 serta persediaan menghadapi musim tengkujuh setiap hujung tahun.

JAWAPAN

Tuan Yang Di-Pertua,

1. Kementerian Pertanian dan Industri Makanan (MAFI) mengambil berat impak yang dialami oleh para petani dan nelayan yang terjejas dari pandemik COVID-19. Bagi memastikan aktiviti para petani dapat diteruskan, MAFI melalui Pakej Rangsangan Ekonomi (PRE), Pakej Rangsangan Ekonomi Prihatin Rakyat (PRIHATIN) dan Pelan Jana Semula Ekonomi Negara (PENJANA) telah merangka 36 inisiatif di bawah Dana Jaminan Makanan berjumlah RM1 bilion. Inisiatif-inisiatif tersebut dilaksanakan bagi merencanakan semula aktiviti pertanian dan pengeluaran makanan serta mendatangkan pendapatan kepada para pengusaha.

2. Di bawah PRIHATIN, MAFI diperuntukkan sebanyak RM190 juta bagi pelaksanaan program jaminan bekalan makanan melalui pemberian

insentif input, peningkatan mobilisasi dan logistik bahan makanan serta pemantapan pembekalan stok makanan. Selain itu, Pertubuhan Peladang Kawasan (PPK) dan Pertubuhan Nelayan Kawasan (PNK) juga telah diperuntukkan dana khas untuk menggalakkan penglibatan dan aktiviti ahli peladang dan nelayan dalam industri pertanian dan makanan.

3. Di bawah PENJANA, MAFI telah diperuntukkan sebanyak RM350 juta untuk Skim Pembiayaan Mikro Kredit melalui Agrobank yang menawarkan bantuan kewangan dalam bentuk pinjaman dengan kadar faedah 3.5% bagi membantu meringankan beban pengusaha yang terkesan akibat COVID-19. Keseluruhan program / projek yang disenaraikan di bawah pakej-pakej PRE, PRIHATIN dan PENJANA sedang dilaksanakan melalui pelbagai jabatan / agensi di bawah MAFI.

4. Sebagai persediaan menghadapi musim tengkujuh, Kementerian telah mengambil beberapa langkah-langkah seperti berikut:

- i. Menyediakan Tabung Bantuan Bencana Agromakanan (TBBA) (bagi sektor pertanian dan akuakultur) dan Tabung Bantuan Bencana Padi (TBBP) yang boleh dipohon melalui Jabatan Pertanian Negeri;
- ii. Menyediakan bantuan Tabung Bencana Alam bagi golongan nelayan melalui LKIM bertujuan untuk memberi bantuan dan sumbangan segera kepada nelayan atau keluarga yang terlibat dalam kemalangan atau bencana alam yang melibatkan kemusnahan, kerosakan harta benda dan kehilangan nyawa; dan
- iii. Menubuhkan Kumpulan Keselamatan Nelayan (KESAN) dan Pasukan Gerakan Pengurusan Bencana bagi memberi bantuan kepada nelayan semasa berlaku bencana atau kemalangan di laut. Pasukan ini akan bekerjasama dengan pasukan penyelamat dan membantu di dalam operasi pemindahan mangsa bencana alam serta pengagihan

SOALAN NO : 21

bantuan bekalan makanan ke tempat-tempat yang terputus hubungan.

5. Dalam perancangan Rancangan Malaysia Ke-12, Kementerian turut memberi perhatian kepada aspek kebajikan golongan sasaran nelayan dan petani dengan merancang pelaksanaan program dan projek pertanian yang dapat meningkatkan pendapatan dan taraf hidup golongan ini.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA
PARLIMEN KE-14**

PERTANYAAN : LISAN

**DARIPADA : TUAN HAJI YAMANI HAFEZ BIN MUSA
[SIPITANG]**

TARIKH : 15 DISEMBER 2020 (SELASA)

SOALAN

TUAN HAJI YAMANI HAFEZ BIN MUSA [SIPITANG] minta **MENTERI KEWANGAN** menyatakan sejauh mana keberhasilan Pakej Rangsangan Ekonomi Prihatin Rakyat (PRIHATIN) dan Pelan Jana Semula Ekonomi Negara (PENJANA) yang diumumkan kerajaan awal tahun ini, bagi menggerak serta memulihkan ekonomi negara.

JAWAPAN

Tuan Yang di-Pertua,

1. Untuk makluman Ahli Yang Berhormat, Kerajaan telah mengumumkan Pakej-pakej rangsangan ekonomi PRIHATIN, PRIHATIN PKS TAMBAHAN, PENJANA dan KITA PRIHATIN yang keseluruhannya bernilai RM305 bilion. Secara keseluruhannya, terdapat lebih daripada 80 inisiatif yang telah diumumkan di bawah pakej-pakej rangsangan ekonomi tersebut di mana sebanyak RM176.3 billion atau 57.8% telah dibelanjakan setakat 27 November 2020.
2. Bagi pakej PRIHATIN dan PRIHATIN PKS TAMBAHAN yang bernilai RM260 bilion, sebanyak RM156.3 bilion atau 60% telah dibelanjakan setakat 27 November 2020.
3. Bagi pakej PENJANA pula, sebanyak RM15 bilion atau 43% daripada RM35 bilion yang diumumkan telah dibelanjakan sehingga 27 November 2020.
4. Bagi Pakej KITA PRIHATIN pula, sebanyak RM5 bilion atau 50% daripada RM10 bilion yang diumumkan telah disalurkan sehingga 27 November 2020.
5. Unit LAKSANA telah menjalankan Kaji Selidik PRIHATIN bagi melihat penerimaan rakyat terhadap inisiatif di bawah Pakej PRIHATIN pada 19 Ogos hingga 11 September 2020. Daripada 11,150 responden, sebanyak 76% responden berpuas hati dengan bantuan yang telah diberikan.
6. Melalui Kaji Selidik PRIHATIN ke atas perniagaan pula, laporan mencatatkan sekurang-kurangnya 68% kepuasan hati di kalangan empat kategori perniagaan terhadap inisiatif yang telah dilaksanakan. Pihak Unit LAKSANA dari semasa ke semasa memantau pelaksanaan inisiatif-inisiatif pakej rangsangan ekonomi bagi memastikan pelaksanaan adalah cekap, berkesan dan mencapai kumpulan disasarkan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KE EMPAT BELAS**

PERTANYAAN : LISAN

DARIPADA : DATUK ROBERT LAWSON CHUAT [BETONG]

TARIKH : 15 DISEMBER 2020 (SELASA)

SOALAN

Minta **MENTERI PERTANIAN DAN INDUSTRI MAKANAN** menyatakan:

- (a) berapa peruntukan dari Kementerian untuk meningkatkan pengeluaran ternakan Ruminan di Sarawak; dan
- (b) apakah perancangan Kementerian untuk menentukan '*Self-Sufficiency Level*' (SSL) bagi daging lembu dan kambing dapat ditingkatkan.

JAWAPAN

Tuan Yang di-Pertua,

1. Sepanjang pelaksanaan Rancangan Malaysia Kesebelas (RMKe11), sebanyak RM69 juta peruntukan telah diluluskan kepada agensi-agensi berkaitan di Negeri Sarawak bagi projek-projek berkaitan dengan pengeluaran ternakan ruminan seperti lembu, kerbau dan kambing. Peruntukan ini meliputi usaha-usaha pembangunan makanan ternakan, kesihatan, benih serta baka haiwan ternakan ruminan.

2. Pada tahun 2019, tahap SSL daging lembu/kerbau negara berada pada tahap 21.72% manakala daging kambing ialah 10.72%. Pelan Strategik Pembangunan Industri Pedaging Negara telah dibangunkan oleh MAFI melalui Jabatan Perkhidmatan Veterinar bertujuan meningkatkan pengeluaran dan tahap SSL daging lembu/kerbau dan kambing/bebiri.

3. Kerajaan mensasarkan pengeluaran daging lembu/kerbau mencapai 30% SSL melalui penambahan induk kepada 878,298 ekor dengan pengeluaran sebanyak 50,000 tan metrik dan daging kambing/bebiri mencapai 18% SSL dengan pengeluaran sebanyak 6,000 metrik tan menjelang 2025.
4. Pelbagai inisiatif yang telah dirancang dan sedang dilaksanakan bagi tujuan untuk meningkatkan pengeluaran ternakan ruminan di samping meningkatkan pendapatan dalam kalangan penternak kecil dan semi-komersial di seluruh negara.
5. Antara inisiatif-inisiatif yang dilaksanakan MAFI melalui Jabatan Perkhidmatan Veterinar adalah seperti berikut:
 - i. program rintis iaitu Program Pembangunan Industri Ruminan (PROPER) yang merupakan insentif berbentuk geran pepadanan kepada penternak semi komersial menerusi konsep 70:30 iaitu pembiayaan sebanyak 70% daripada kerajaan manakala 30% adalah daripada penternak;
 - ii. Projek *Entry Point Project 5* (EPP5) iaitu projek integrasi lembu di ladang kelapa sawit yang melibatkan pelaksanaan penternakan integrasi di kawasan perladangan kelapa sawit yang memfokuskan kepada peningkatan pengeluaran lembu; dan
 - iii. penggalakkan penglibatan agropreneur muda dalam sektor ternakan terutamanya industri ruminan melalui program bantuan Geran Agropreneur Muda (GAM) dalam bentuk barangan (*in-kind*) dengan had maksimum sebanyak RM20,000 pembiayaan melalui Agrobank atau TEKUN Nasional bagi projek – projek pengembangan yang dijalankan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : PUAN MARIA CHIN BINTI ABDULLAH
[PETALING JAYA]**

TARIKH : 15 DISEMBER 2020 [SELASA]

SOALAN

Minta **MENTERI PERUMAHAN DAN KERAJAAN TEMPATAN** menyatakan pembinaan hotel 15 tingkat di Bukit Fraser dibenarkan tanpa penilaian impak alam sekeliling yang menyeluruh dan tanpa berunding dengan penduduk tempatan sedangkan kawasan tersebut merupakan kawasan sensitif alam sekitar.

JAWAPAN

Tuan Yang di-Pertua,

1. Untuk makluman Yang Berhormat, pemajuan sesuatu tanah bagi tujuan pendirian bangunan adalah tertakluk kepada beberapa proses kelulusan termasuk Perihal Tanah, Kebenaran Merancang (KM), Pelan Jalan dan Parit, Pelan Bangunan dan Pelan Kerja Tanah. Pemaju perlu mendapatkan kelulusan pelan-pelan ini daripada Pentadbir Tanah Negeri dan Pihak Berkuasa Tempatan (PBT) yang terlibat sebelum sebarang aktiviti pembinaan boleh dijalankan.

2. Pelan-pelan pemajuan ini perlu dikemukakan oleh pemaju ke Unit Pusat Setempat (OSC) di PBT berkaitan untuk dipertimbangkan bagi kelulusan. OSC akan mendapatkan ulasan terhadap permohonan daripada Jabatan/Agensi Teknikal untuk dijadikan asas kepada pertimbangan oleh PBT dalam Jawatankuasa Pusat Setempat.

3. Semakan dengan PBT berkaitan mendapati pemajuan pembinaan hotel 15 tingkat ini merupakan projek '*Fraser Hill Resort and Spa*'. Berdasarkan Akta Perancangan Bandar dan Desa 1976 (Akta 172), pembangunan projek ini tidak perlu merujuk kepada penduduk tempatan atau lebih tepat pemunya lot berjiran memandangkan **kawasan ini telah mempunyai Rancangan Tempatan yang diwartakan**, iaitu Rancangan Tempatan Daerah Raub 2003-2015. Guna tanah yang ditetapkan bagi tapak ini adalah bagi tujuan komersil dan kelulusannya adalah bertepatan dengan kegunaan yang dirancangkan. Proses penyediaan sesuatu Rancangan Tempatan sebelum ianya diwartakan terutamanya untuk menentukan penggunaan tanah ini telah melalui peringkat-peringkat publisiti (penglibatan awam) dan bantahan selaras keperluan Akta 172.

4. Untuk makluman Yang Berhormat juga, Jabatan Alam Sekitar (JAS) telah mengeluarkan ulasan secara bertulis di peringkat Kebenaran Merancang pada 4 Julai 2018 dan 11 September 2020 bagi pembangunan projek hotel yang dinyatakan. Berdasarkan ulasan tersebut, semakan JAS mendapati cadangan pembangunan tersebut adalah di atas tapak yang telah dibangunkan sebelum ini yang dahulunya adalah Hotel Jelai dan tidak melibatkan pembukaan kawasan baharu. Oleh itu, projek ini tidak tertakluk kepada keperluan penyediaan Laporan Penilaian Kesan Kepada Alam Sekeliling (EIA).

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KE-14**

PERTANYAAN : LISAN

**DARIPADA : DATO' SERI UTAMA HAJI MUKHRIZ
BIN TUN DR. MAHATHIR [JERLUN]**

TARIKH : 15 DISEMBER 2020 (SELASA)

SOALAN

DATO' SERI UTAMA HAJI MUKHRIZ BIN TUN DR. MAHATHIR [JERLUN] minta **MENTERI KEWANGAN** menyatakan jelaskan adakah Kerajaan berpendapat negara tidak lagi memerlukan perkhidmatan penerbangan nasional jika dibiarkan Malaysia Airlines dibelenggu masalah kewangan yang kritikal.

JAWAPAN

1. Tuan Yang Dipertua, selari dengan pelaksanaan Pelan Pemulihan Malaysian Airline System Bhd (MAS) yang bertujuan menstruktur semula dan memulihkan operasi syarikat penerbangan nasional, Malaysia Airlines Berhad (MAB) telah ditubuhkan pada 7 November 2014. Penubuhan MAB bertujuan untuk mengambil alih operasi, aset dan liabiliti syarikat MAS. MAB seterusnya diletakkan di bawah Malaysia Aviation Group Berhad (MAGB) yang dimiliki sepenuhnya oleh Khazanah Nasional Berhad (Khazanah).
2. Memandangkan Kerajaan tidak mempunyai sebarang pegangan saham dalam MAGB dan MAB, sebarang cadangan pemulihan dan penstrukturan syarikat adalah tertakluk kepada pertimbangan dan kelulusan Lembaga Pengarah Khazanah, selaku pemegang saham tunggal syarikat.

3. Sehingga kini, Khazanah telah menyuntik kira-kira RM28 bilion ke dalam syarikat penerbangan tersebut manakala jumlah liabiliti MAGB pada masa ini yang akan disusun semula adalah dianggarkan sebanyak RM16 bilion. Setakat 31 Ogos 2020, jumlah kecairan yang dimiliki oleh Kumpulan MAGB adalah kira-kira RM366 juta selain kira-kira RM578 juta yang tersedia untuk digunakan daripada dana yang diperuntukkan oleh Khazanah.
4. Kesan COVID-19 terhadap industri penerbangan secara global adalah amat buruk dan Malaysia Airlines tidak terkecuali daripada menerima impak daripada penularan pandemik ini. Malaysia Airlines kini beroperasi dengan kira-kira 75% daripada pesawatnya tidak dapat diterbangkan akibat sekatan perjalanan, dan turut menyaksikan kapasiti dan pendapatannya terjejas.
5. Sehubungan dengan itu, Kerajaan komited untuk membantu semua pihak yang terjejas dengan penularan wabak COVID-19. Kerajaan melalui Skim Jaminan Prihatin Danajamin (SJPD) menyediakan program pembiayaan bernilai RM50 bilion dengan jaminan sebanyak 80% ke atas pembiayaan bagi modal kerja syarikat. Namun demikian, kemudahan jaminan ini disediakan untuk manfaat kepada semua syarikat yang beroperasi di Malaysia dalam semua sektor termasuk sektor penerbangan tertakluk kepada syarat-syarat kelayakan yang telah ditetapkan.
6. Bagi mengatasi masalah kewangan MAGB dan MAB, Kerajaan akan mengadakan rundingan lanjut dengan pihak Khazanah bagi mengenal pasti hala tuju syarikat khususnya dalam memperkukuhkan kedudukan kewangannya dan mengenal pasti penyelesaian strategik yang terbaik bagi kumpulan penerbangan tersebut.
7. Ini adalah untuk memastikan ketersambungan atau '*connectivity*' untuk negara sentiasa terpelihara dan Khazanah sebagai dana pelaburan negara sedia untuk memainkan peranannya berhubung Malaysia Airlines Berhad bagi mencapai aspirasi Kerajaan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : DATUK SERI SHAMSUL ISKANDAR @
YUSRE BIN MOHD AKIN [HANG TUAH JAYA]**

TARIKH : 15 DISEMBER 2020 [SELASA]

SOALAN

Minta **MENTERI PERUMAHAN DAN KERAJAAN TEMPATAN** menyatakan senarai inisiatif yang telah dilaksanakan oleh Pihak Berkuasa Tempatan khususnya di Melaka sepanjang Perintah Kawalan Pergerakan, Perintah Kawalan Pergerakan Bersyarat dan Perintah Kawalan Pergerakan Pemulihan dan apakah rancangan Kementerian untuk meningkatkan lagi kecekapan PBT untuk membendung penularan wabak COVID-19.

JAWAPAN

Tuan Yang di-Pertua,

1. Untuk makluman Yang Berhormat, beberapa inisiatif telah dilaksanakan oleh Pihak Berkuasa Tempatan (PBT) di Melaka dalam tempoh Perintah Kawalan Pergerakan (PKP), Perintah Kawalan Pergerakan Bersyarat (PKPB) dan Perintah Kawalan Pergerakan Pemulihan (PKPP) seperti berikut:

- (a) Pengecualian sewaan ruang niaga/gerai selama 2 bulan (April dan Mei 2020);
- (b) Pengecualian fi lesen selama satu tahun bagi lesen penjaja, peniaga pasar malam dan pasar pagi; dan

- (c) Penangguhan bayaran denda lewat sewaan gerai dan pembaharuan lesen kepada penyewa gerai/medan selera.

2. Untuk makluman Yang Berhormat juga, bagi meningkatkan kecekapan PBT untuk membendung penularan wabak COVID-19, Kementerian Perumahan dan Kerajaan Tempatan (KPKT) telah menubuhkan Pasukan Gerak Kerja (*Taskforce*) pada 30 Mac 2020 yang terdiri daripada pakar-pakar dalam bidang masing-masing dari Kementerian Kesihatan Malaysia (KKM), Jabatan Bomba dan Penyelamat Malaysia (JBPM), Jabatan Kimia Malaysia, PBT dan lain-lain agensi bagi melaksanakan operasi sanitasi awam. Tujuan operasi sanitasi awam dilakukan adalah untuk mengurangkan jumlah kuman ke tahap selamat dari jangkitan manakala basmi kuman (*disinfection*) adalah untuk membunuh hampir 100% kuman. Sanitasi awam dilakukan di tempat-tempat seperti pasar awam, taman awam dan bangunan-bangunan kerajaan. Pelaksanaan Operasi Sanitasi Awam COVID-19 disasarkan di kawasan yang telah dikenal pasti oleh KKM seperti berikut:

- (a) Fasa pertama - kawasan kes tinggi (red zone area) akan dijalankan secara serentak;
- (b) Fasa kedua - kawasan di bawah kategori zon jingga akan dijalankan secara berperingkat; dan
- (c) Fasa ketiga - kawasan di bawah kategori zon kuning akan dijalankan berdasarkan arahan pihak berkuasa.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : DATUK WIRA HAJI MOHD. ANUAR
MOHD. TAHIR [TEMERLOH]**

TARIKH : 15 DISEMBER 2020 [SELASA]

SOALAN

Minta **MENTERI PERUMAHAN DAN KERAJAAN TEMPATAN** menyatakan apakah ada usaha mempertingkatkan dan mengkaji semula “Garis Panduan Perancangan Pembangunan di Kawasan Bukit Dan Tanah Tinggi”, serta program “audit bagi projek keselamatan cerun” supaya masalah cerun runtuh dapat diatasi dan keselamatan penduduk terpelihara.

JAWAPAN

Tuan Yang di-Pertua,

1. Untuk makluman Yang Berhormat, Kementerian Perumahan dan Kerajaan Tempatan (KPKT) melalui PLANMalaysia (Jabatan Perancangan Bandar dan Desa) telah menyediakan Garis Panduan Perancangan (GPP) Pembangunan Di Kawasan Bukit dan Tanah Tinggi pada tahun 2009. GPP ini dibuat untuk menyelaraskan dua garis panduan sedia ada iaitu Garis Panduan Pembangunan di Kawasan Bukit yang disediakan oleh KPKT pada tahun 1997 dan Garis Panduan Pembangunan di Kawasan Tanah Tinggi oleh Kementerian Sumber Asli dan Alam Sekitar (KSAAS) pada tahun 2005.

2. GPP Pembangunan Di Kawasan Bukit dan Tanah Tinggi ini bertujuan untuk digunakan oleh Pihak Berkuasa Negeri, Pihak Berkuasa Tempatan dan agensi pelaksana dalam merancang dan mengawal aktiviti pembangunan di kawasan tanah berbukit, tanah tinggi, lereng bukit dan kawasan sekitarnya. Kawalan perancangan bagi pembangunan secara umumnya adalah mengikut kelas dan ketinggian seperti berikut:

- a. Kelas I - Pembatasan geoteknikal yang rendah seperti cerun yang dipotong $<15^{\circ}$;
- b. Kelas II - Pembatasan geoteknikal yang sederhana seperti terain in-situ dengan cerun $\geq 15^{\circ}$ dan $<25^{\circ}$;
- c. Kelas III - Pembatasan geoteknikal yang tinggi seperti terain in-situ dengan cerun $\geq 25^{\circ}$ dan $<35^{\circ}$; dan
- d. Kelas IV - Pembatasan geoteknikal yang ekstrem seperti terain in-situ dengan cerun $\geq 35^{\circ}$.

Maklumat terperinci berhubung syarat-syarat pembangunan mengikut kelas ini boleh dirujuk di GPP Pembangunan Di Kawasan Bukit dan Tanah Tinggi ini.

3. KPKT mempunyai perancangan untuk menterjemahkan GPP Kawasan Sensitif Alam Sekitar (KSAS) ke dalam Penyediaan Rancangan Pemajuan. KPKT juga akan terus memantau dari semasa ke semasa jika terdapat sebarang isu berkaitan pemakaian GPP ini dan bersedia untuk melaksanakan kajian bagi penambahbaikan GPP ini sekiranya terdapat keperluan.

Program Audit Bagi Projek Keselamatan Cerun

4. Untuk makluman Yang Berhormat, Kerajaan sentiasa mengambil serius terhadap isu-isu cerun yang melibatkan keselamatan rakyat. Kerajaan melalui Jabatan Kerja Raya (JKR) sentiasa melaksanakan pemantauan cerun bahaya yang berisiko secara aktif dengan menggunakan kaedah pemantauan berkala, pemantauan berterusan serta pembangunan berperingkat pelan pemetaan cerun bahaya dan berisiko seperti berikut:

- (a) **Pelan Pemetaan Cerun Bahaya:** Peta risiko cerun telah mula dibangunkan sejak tahun 1996. Peta bahaya dan risiko cerun ini telah dibangunkan secara berperingkat di sepanjang Jalan Persekutuan di Semenanjung Malaysia. Kerajaan melalui JKR juga telah membangunkan *Integrated Slope Management System* (ISMAS) bagi memudahkan pengurusan dan pemantauan cerun-cerun yang bahaya dan berisiko ini;
- (b) **Pemantauan berkala:** Pemantauan berkala turut dilaksanakan oleh semua Jurutera Daerah terutama di musim tengkujuh. Ini termasuklah melaksanakan langkah-langkah untuk mengurangkan risiko cerun runtuh, pemeriksaan dan penyenggaraan serta pembaikan kecil

cerun bagi mengelak runtuh cerun yang lebih besar. Kerja-kerja penyenggaraan rutin yang bersifat pembaikan (*corrective*) dilaksanakan mengikut keutamaan. Malah terdapat juga kerja-kerja pencegahan (*preventive*) dilaksanakan bagi cerun-cerun yang telah dikenal pasti berisiko dan mendatangkan bahaya kepada pengguna;

- (c) **Pemantauan berterusan:** Pemasangan alat-alat sistem amaran awal di cerun-cerun yang sangat berisiko bagi memantau pergerakan cerun; dan
- (d) **Khidmat nasihat:** Kerajaan melalui JKR turut melaksanakan projek-projek pembaikan cerun yang melibatkan bangunan dan premis-premis kerajaan. Malah pihak JKR bersedia untuk memberikan khidmat nasihat berkaitan cerun kepada mana-mana agensi yang memerlukan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : DATO' SRI RICHARD RIOT ANAK JAEM
[SERIAN]**

TARIKH : 15 DISEMBER 2020 (SELASA)

SOALAN

Minta **MENTERI PERTANIAN DAN INDUSTRI MAKANAN** menyatakan langkah-langkah yang telah diambil dalam membantu pekebun kecil terutamanya pekebun kecil nanas di Sarawak amnya dan di Serian khasnya bagi memasarkan produk mereka.

JAWAPAN

Tuan Yang di-Pertua,

1. Kementerian Pertanian dan Industri Makanan (MAFI) melalui Lembaga Perindustrian Nanas (LPNM), Lembaga Pemasaran Pertanian Persekutuan (FAMA) serta dibantu oleh Jabatan Pertanian Sarawak (DOA Sarawak) telah mengambil beberapa langkah bagi membantu pekebun kecil nanas di Sarawak amnya dan di Serian khasnya memasarkan produk mereka. Sebagai latar belakang, keluasan penanaman nanas di Negeri Sarawak adalah 2,859.07 hektar pada tahun 2019 dan dijangka akan terus meningkat. Bagi kawasan Serian khususnya, keluasan penanaman nanas semasa adalah 36.43 hektar dengan kebanyakannya daripada varieti N36 dan Moris seiring dengan permintaan yang tinggi di kawasan berkenaan.
2. Antara langkah yang telah diambil ialah menyediakan saluran pemasaran seperti Medan Gerai Buah-Buahan Segar (GBBS), Medan Niaga Satok, Pasar Tani, Agrobazaar Kedai Rakyat (AKR) dan

Agrobazaar Rakyat (ABR). Di Sarawak, terdapat 31 medan GBBS, 36 buah Pasar Tani, 41 buah AKR dan 17 buah ABR.

3. Selain itu, FAMA turut menggalakkan pengeluar nanas untuk menyertai Program Ladang Kontrak MAFI. Dengan menjadi peserta, pengeluar boleh mendapat jaminan pasaran melalui perjanjian *forward agreement* sama ada dengan pemasar swasta ataupun FAMA. Sebagai contoh, FAMA telah melaksanakan pengaturan pasaran yang melibatkan peserta Ladang Kontrak di Sg. Mata, Samarahan dan di Bau, Kuching dengan pemasar swasta yang melibatkan sebanyak 380 metrik tan nanas dengan anggaran nilai RM1.05 juta. Manakala bagi belian terus melalui pusat operasi FAMA, sebanyak 3,073 biji nanas dengan nilai belian RM3,345.70 telah direkodkan sehingga 31 Oktober 2020.

4. Kerajaan juga telah menyediakan 19 buah Pusat Pengumpulan Ladang di negeri Sarawak bagi memudahkan petani mengumpul, menggred dan seterusnya membungkus hasil pertanian sebelum dipasarkan. Petani juga digalakkan menjual hasil keluaran mereka terus kepada pengguna melalui platform anjuran FAMA seperti Program Jualan Terus Dari Ladang (JTDL), MyBest Buy (MBB) @ MAFI Mart serta melalui Agrobazaar Online.

5. Selain bantuan pemasaran, bantuan infrastruktur serta khidmat pengembangan turut diberikan perhatian dalam membantu pekebun kecil nanas di Sarawak. Pembangunan kemudahan infrastruktur pertanian terutamanya pembinaan dan penambahbaikan jalan ladang telah dilaksanakan bagi memudahkan pengangkutan hasil pertanian dari ladang ke pasaran. Selain itu, khidmat pengembangan dan latihan bagi meningkatkan pengetahuan dan pemindahan teknologi terkini kepada para petani terutamanya dalam bidang tambah nilai bagi produk hiliran turut disediakan.

Sekian, terima kasih.

**PEMBERITAHUAN PERTANYAAN DEWAN RAKYAT MALAYSIA
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : TUAN LARRY SOON @ LARRY SNG WEI
SHIEN [JULAU]**

TARIKH : 15 DISEMBER 2020 (SELASA)

SOALAN:

minta **MENTERI PEMBANGUNAN LUAR BANDAR** menyatakan usaha Kementerian menyediakan bekalan air bersih kepada rumah-rumah panjang yang terletak di dalam kawasan FELCRA dan SALCRA di Sarawak memandangkan sungai-sungai di kawasan tersebut telah tercemar

JAWAPAN

Tuan Yang di-Pertua,

Terdapat 26 buah rumah panjang yang terletak berhampiran dengan projek-projek dibawah FELCRA Berhad Wilayah Sarawak. Soal bekalan air ke rumah panjang kawasan luar Bandar di Sarawak adalah di bawah seliaan Jabatan Bekalan Air Luar Bandar (JBALB) Sarawak. Pihak FELCRA akan memaklumkan dan berunding dengan kerajaan negeri bagi mencari penyelesaian terbaik kepada isu ini.

Untuk makluman juga bahawa di dalam Parlimen Julau, terdapat 2 projek FELCRA di bawah FELCRA Berhad Kawasan Sibu iaitu projek Julau 1 & Julau 2 yang dimajukan dengan tanaman kelapa sawit seluas 602.08 hektar serta terdapat 3 buah rumah panjang (bukan Kawasan Penempatan FELCRA) yang berhampiran dengan projek iaitu Rumah Panjang Biyan, Rumah panjang Entili dan Rumah Panjang Vincent yang memperoleh bekalan air bersih daripada JBALB Sarawak.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KE-14**

PERTANYAAN : LISAN

**DARIPADA : DATO' SERI HAJI ABDUL HADI AWANG
[MARANG]**

TARIKH : 15 DISEMBER 2020 (SELASA)

SOALAN

DATO' SERI HAJI ABDUL HADI AWANG [MARANG] minta **MENTERI KEWANGAN** menyatakan apakah usaha Kerajaan bagi memulihkan ekonomi setempat yang terkesan dengan Perintah Kawalan Pergerakan Bersyarat (PKPB) seperti di Sabah, Kuala Lumpur, Selangor dan Wilayah Persekutuan Putrajaya.

JAWAPAN

Tuan Yang di-Pertua,

1. Untuk makluman Yang Berhormat, Penularan COVID-19 yang semakin meningkat baru-baru ini di beberapa negeri telah mengakibatkan Kerajaan terpaksa melaksanakan Perintah Kawalan Pergerakan Bersyarat (PKPB) setelah tempoh Perintah Kawalan Pergerakan (PKP) tamat. Tidak dapat dinafikan dengan PKP, kelangsungan hidup rakyat agak terjejas khususnya ekonomi setempat. Namun, Kerajaan akan mengimbangi kawalan pergerakan dan keperluan melakukan aktiviti harian untuk melindungi nyawa dan kehidupan rakyat. Kelangsungan ekonomi perlu dilindungi untuk memastikan momentum pemulihan ekonomi dapat dikekalkan seiring dengan bantuan-bantuan yang disediakan oleh Kerajaan dengan pematuhan SOP yang telah ditetapkan.
2. Maka, bagi membantu meringankan beban rakyat dalam mendepani tempoh PKPB ini, Kerajaan telah menyediakan pelbagai inisiatif atau bantuan secara berfasa dan mengikut keperluan semasa

bermula dengan PRIHATIN, PRIHATIN PKS TAMBAHAN, PENJANA dan terkini, KITA PRIHATIN. Keseluruhan pakej-pakej ini adalah bernilai RM305 bilion.

3. Selain itu, semasa pembentangan Belanjawan 2021 pada 6 November 2020 yang lalu, Kementerian Kewangan turut mengumumkan pelbagai inisiatif tambahan bagi membantu rakyat, golongan peniaga kecil dan PKS mikro serta sektor ekonomi. Antara bentuk bantuan yang telah diumumkan adalah Bantuan Prihatin Rakyat, Program Jaringan Prihatin, Insentif PenjanaKerjaya dan sebagainya.

4. Kerajaan ini adalah Kerajaan yang responsif dan mendengar nada dan nadi rakyat. Segala bentuk pemberian insentif dan bantuan sentiasa dikaji dan akan dinilai semula dengan membuat langkah penambahbaikan pada dasar serta polisi bantuan. Kerajaan akan memastikan semua program di bawah pakej-pakej rangsangan ekonomi dan inisiatif Belanjawan 2021 yang dirancang dan sedang berlangsung akan dilaksanakan secara cekap dan berkesan bagi memastikan ianya mencapai impak yang disasarkan serta mencadangkan langkah-langkah penambahbaikan sekiranya perlu.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KE TIGA, PENGGAL KE TIGA,
PARLIMEN KEEMPATBELAS**

PERTANYAAN : JAWAB LISAN

**DARIPADA : YB DATUK SERI PANGLIMA DATUK AZEEZ
RAHIM (BALING)**

TARIKH : 15 DISEMBER 2020 (RABU)

SOALAN

DATO' SRI ABDUL AZEEZ BIN ABDUL RAHIM [BALING] minta **MENTERI DALAM NEGERI** menyatakan status terkini siasatan dan tindakan terhadap kes kematian pegawai bomba, Allahyarham Muhammad Adib bin Mohd Kassim sedangkan Mahkamah Koroner telah pun membuat keputusan bahawa tragedi tersebut adalah disebabkan oleh pelakuan jenayah dan apakah rancangan lanjut Kementerian bagi membolehkan keadilan terlaksana.

JAWAPAN

Tuan Yang Di Pertua,

Sebagaimana Ahli Yang Berhormat semua sedia maklum, Mahkamah Koroner Shah Alam yang bersidang pada 27 September 2019, telah memutuskan punca kematian anggota bomba, Muhammad Adib bin Mohd Kassim, bukanlah disebabkan kemalangan tetapi disebabkan perbuatan jenayah oleh dua (2) orang atau lebih suspek. Berdasarkan keputusan tersebut, PDRM telah menjalankan siasatan berdasarkan arahan Pejabat Peguam Negara dan mengumpul bukti-bukti yang ada untuk dikemukakan semula kepada pihak pendakwaan.

Kertas siasatan juga telah dirujuk semula ke Jabatan Peguam Negara (AGC) pada 23 Julai 2020 dengan cadangan-cadangan seperti berikut:

- i. Menuduh 12 orang suspek di bawah Seksyen 143 Kanun Keseksaan yang merusuh dan menyerang jentera bomba; dan
- ii. Mengadakan inkues semula untuk siasatan lanjut jika dipersetujui oleh Peguam Negara di bawah peruntukan Seksyen 339(2) Kanun Prosedur Jenayah.

Memandangkan sehingga kini Kertas Siasatan dan cadangan inkues semula berkenaan masih berada di AGC, saya tidak berhasrat untuk mengulas lebih lanjut isu inkues semula ini agar tidak mengganggu siasatan ataupun mendahului keputusan AGC.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KE-14**

PERTANYAAN : LISAN

DARIPADA : TUAN TONY PUA KIAM WEE [DAMANSARA]

TARIKH : 15 DISEMBER 2020 (SELASA)

SOALAN

TUAN TONY PUA KIAM WEE [DAMANSARA] minta **MENTERI KEWANGAN** menyatakan kedudukan terkini perjanjian jual-beli saham Bandar Malaysia Sdn. Bhd. terutamanya sama ada bayar RM1.1 bilion telah dibuat sebelum 15 September 2020 dan syarat-syarat pembelian sebelum 5 November 2020.

JAWAPAN

Tuan Yang Dipertua,

1. Selaras dengan kelulusan Jemaah Menteri pada 1 November 2019, satu perjanjian *Restated and Amended Share Sale Agreement* (RASSA) dan *Shareholder's Agreement* (SHA) antara TRX City Sdn Bhd (TRXC), IWH CREC Sdn Bhd (ICSB) dan Bandar Malaysia Sdn Bhd (BMSB) telah dimeterai pada 17 Disember 2019 bagi tujuan penjualan 60% saham BMSB oleh TRXC kepada ICSB. Berdasarkan perjanjian tersebut, nilai jualan bersih yang bakal diterima TRXC adalah sebanyak RM6.45 bilion.

2. Seterusnya, Kementerian Kewangan dan TRXC pada 10 April 2020 telah meluluskan permohonan ICSB supaya diberikan *Extension of Time* (EOT) untuk memenuhi syarat *Conditions Precedent* (CP) dari 17 Jun 2020 kepada selewat-lewatnya 5 November 2020 dan EOT pembayaran baki deposit dan pendahuluan dari 30 April 2020 kepada selewat-lewatnya 15 September 2020.

3. ICSB pada 15 September 2020 telah melunaskan sepenuhnya baki bayaran deposit dan pendahuluan, menjadikan jumlah keseluruhan yang telah dibayar kepada TRXC setakat ini adalah sebanyak RM1.241 billion.

Tuan Yang Dipertua,

4. ICSB kemudiannya melalui surat bertarikh 2 Oktober 2020 sekali lagi telah memohon supaya tarikh penyempurnaan CP di bawah perjanjian RASSA dilanjutkan untuk tempoh 6 bulan iaitu daripada 5 November 2020 kepada 5 Mei 2021.

5. Justifikasi bagi permohonan EOT kali kedua ini antara lain adalah seperti berikut:-

- i. operasi dan perancangan ICSB telah terjejas teruk akibat penularan pandemik Covid-19 yang bukan sahaja

mengakibatkan impak negatif kepada Malaysia dan Kerajaan Republik Rakyat China (RRC) malah seluruh dunia;

- ii. ICSB masih belum dapat menyelesaikan proses *due diligence* ke atas BMSB berikutan pihaknya antara lain masih belum menerima beberapa dokumen yang diperlukan;
- ii. CP bagi ICSB di bawah RASSA masih belum dapat disempurnakan kerana ia melibatkan agensi dan pihak berkuasa yang diluar kawalan dan bidang kuasa ICSB; dan
- iv. ICSB masih belum mendapatkan Jaminan Bank bagi bayaran akhir sebanyak RM3.283 bilion yang perlu dikemukakan kepada TRXC pada tarikh *Completion Date*.

6. Sehubungan dengan itu, melalui perbincangan yang telah diadakan, kedua-dua pihak antara lain telah bersetuju:-

- i. supaya tempoh penyempurnaan CP di bawah perjanjian RASSA dilanjutkan untuk tempoh 6 bulan iaitu dari 5 November 2020 kepada 5 Mei 2021;
- ii. supaya tarikh akhir pembayaran untuk *payment milestone* ketiga dan keempat (kos PUKL) oleh ICSB sebanyak RM1.926 bilion adalah kekal seperti sedia ada dan ditetapkan pada tarikh yang tidak boleh diubah berdasarkan EOT pertama yang telah diberikan iaitu pada Mei 2021 dan November 2021; dan
- iii. supaya ICSB menanggung 60% obligasi pembayaran Sukuk BMSB yang akan matang pada Februari 2021.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA
PARLIMEN KE-EMPAT BELAS**

PERTANYAAN : LISAN

DARIPADA : TUAN LOKE SIEW FOOK [SEREMBAN]

TARIKH : 15 DISEMBER 2020 (SELASA)

SOALAN

Minta **MENTERI PENGANGKUTAN** menyatakan anggaran pampasan yang perlu dibayar kepada Syarikat Dhaya Maju LTAT ekoran pembatalan kontrak projek KVDT2

JAWAPAN

Yang Di-Pertua,

Untuk makluman Ahli Yang Berhormat, buat masa sekarang, anggaran pampasan kepada Syarikat Dhaya Maju LTAT Sdn. Bhd. (DMLTAT) belum dimuktamadkan. Ia akan ditetapkan selepas kajian lengkap disediakan oleh perunding yang bakal dilantik.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : DATUK SERI DR. MUJAHID BIN YUSOF
RAWA [PARIT BUNTAR]**

TARIKH : 15 DISEMBER 2020 (SELASA)

SOALAN

Minta **MENTERI PERTANIAN DAN INDUSTRI MAKANAN** menyatakan cabaran yang menjadi halangan kepada implementasi insurans tanaman terutamanya bagi tanaman utama yang menjamin sekuriti makanan negara iaitu padi.

JAWAPAN

Tuan Yang Di-Pertua,

1. Kementerian Pertanian dan Industri Makanan (MAFI) sentiasa memberikan penekanan terhadap keselamatan bekalan makanan negara dengan mengambil pelbagai langkah termasuk memastikan impak yang minimum terhadap bekalan makanan apabila berlaku bencana.
2. Langkah ini dilakukan melalui pengurusan risiko bencana bagi mengenal pasti, menilai dan memastikan supaya aktiviti pertanian dapat diteruskan. Antara mekanisme pengurusan risiko bencana adalah dengan menyediakan peruntukan bagi program seperti berikut:
 - i. tabung bencana;
 - ii. skim perlindungan insurans; atau
 - iii. skim perlindungan takaful.
3. Setiap mekanisme tersebut mempunyai konsep yang berlainan, oleh itu pembangunan dan pelaksanaannya menghadapi cabaran yang berbeza. Cabaran yang paling ketara bagi skim perlindungan insurans dan takaful adalah keperluan kepada data sejarah (*historical data*) pengeluaran, kerugian dan data lain yang berkaitan serta analisis bagi sekurang-kurangnya 10 tahun terakhir. Proses ini juga memerlukan pengetahuan teknikal yang pada ketika ini hanya dapat diperolehi daripada pakar-pakar tertentu dalam industri. Dalam hal ini, MAFI telah bekerjasama bersama Bank Negara Malaysia (BNM) dan pihak industri untuk meneliti dan membangunkan mekanisme skim insurans/takaful.
4. Pada masa yang sama, bagi subsektor padi iaitu antara tanaman utama, MAFI menyediakan Tabung Bencana Tanaman Padi (TBTP) sebagai bantuan khas kepada petani yang mengalami pengeluaran padi luar jangka kesan daripada bencana seperti serangan penyakit, bencana alam dan lain-lain faktor yang tidak dapat dielakkan.

5. Bencana atau kejadian yang memberikan gangguan kepada aktiviti dan pengeluaran tanaman padi dan kehilangan hasil tersebut boleh berbangkit daripada perkara seperti berikut:

- i. kejadian bencana alam seperti banjir, ribut taufan, gempa bumi, tsunami, *El-Nino*, ombak besar, kemarau dan tanah runtuh;
- ii. kejadian empangan/takungan air pecah;
- iii. penyakit tanaman padi yang bukan disebabkan oleh kecuaian manusia; dan
- iv. lain-lain kejadian bencana yang diperaku dan diisytihar oleh Jabatan Teknikal dan Jawatankuasa Teknikal Tabung Bencana Tanaman Padi (TBTP).

6. Bantuan kewangan diberikan kepada pesawah mengikut keluasan penanaman dengan jumlah maksimum bantuan sebanyak tiga (3) hektar. Kadar bantuan adalah seperti berikut:

Bil.	Jenis Bantuan	Kadar Bantuan (RM/ Hektar)
1.	Bantuan Kerugian Hasil Padi *	1,800.00
2.	Bantuan Penanaman Semula Padi **	876.00
3.	Bantuan Input Tanaman Padi	Tertakluk kepada cadangan JK Teknikal

*Bantuan peringkat tanaman 71 -120 hari

**Bantuan peringkat tanaman 1-70 hari

7. Selain bertindak sebagai mekanisme pengurusan risiko bencana, Tabung Bencana Tanaman Padi (TBTP) adalah merupakan sebahagian daripada bantuan sokongan kepada golongan sasaran dan juga sebagai inisiatif Kementerian ke arah mewujudkan program berbentuk *touch-point* khusus kepada pesawah padi. Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KE-14**

PERTANYAAN : LISAN

DARIPADA : Y.B. TUAN OSCAR LING CHAI YEW [SIBU]

TARIKH : 15 DISEMBER 2020 (SELASA)

SOALAN

TUAN OSCAR LING CHAI YEW [SIBU] minta **MENTERI KEWANGAN** menyatakan adakah Kerajaan ada rancangan untuk mengembalikan sistem cukai GST. Apakah kesannya ke atas rakyat berpendapatan rendah dan impak terhadap ekonomi negara.

JAWAPAN

Tuan Yang di-Pertua,

1. Kerajaan sedang menjalankan kajian dan mendapatkan pandangan serta maklum balas pelbagai pihak berkepentingan mengenai kesesuaian untuk melaksanakan apa-apa model cukai kepenggunaan dengan mengambil kira semua aspek termasuk kelemahan sistem cukai jualan dan cukai perkhidmatan sekarang, serta kelemahan sistem GST terdahulu.
2. Kajian ini akan meliputi kesan ke atas ekonomi, kos sara hidup, kesan cukai ke atas harga barang serta keupayaan menangani kegiatan ekonomi gelap. Sebarang sistem cukai, samada ditambahbaik atau baharu, perlu bersifat mudah ditadbir dan tidak meningkatkan kos perniagaan di samping dapat mengukuhkan kedudukan fiskal negara.
3. Namun, Kerajaan tiada sebarang keputusan akan diambil dalam musim COVID-19 ini dan sehingga keadaan ekonomi telah pulih. Keutamaan pada masa ini adalah untuk menyokong usaha-usaha memerangi penularan COVID-19, melindungi rakyat dan menyokong perniagaan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KE TIGA, PENGGAL KE TIGA,
PARLIMEN KEEMPAT BELAS**

PERTANYAAN : JAWAB LISAN

DARIPADA : YB TUAN LUKANISMAN BIN AWANG (SIBUTI)

TARIKH : 15 DISEMBER 2020 (SELASA)

SOALAN

TUAN LUKANISMAN BIN AWANG [SIBUTI] minta **MENTERI DALAM NEGERI** menyatakan :-

- (a) apakah perancangan pihak Kerajaan untuk bina baru gantian penuh pejabat polis serta kuarters yang daif bagi Balai Polis Bekenu; dan
- (b) apakah perancangan bagi mewujudkan unit trafik di Balai Polis Bekenu bagi menangani masalah kes kemalangan.

JAWAPAN

Tuan Yang Di Pertua,

Kementerian masih dalam perancangan untuk menyenaraikan projek pembangunan di kawasan ini dalam masa terdekat bagi program pembangunan fizikal Rancangan Malaysia.

Ini bersesuaian dengan penetapan Dasar Kerajaan untuk bangunan PDRM menggariskan perancangan sesuatu projek perlu mempunyai perjawatan sekurang-kurangnya 20 orang sebagai asas untuk pertimbangan membina Balai Polis baharu. Pihak Kerajaan Negeri perlu menyediakan tapak tanah berkeluasan 5 hingga 10 ekar yang ditetapkan dalam Garis Panduan dan Peraturan bagi Perancangan Bangunan Edisi Tahun 2015, Jawatankuasa Standard dan Kos, Unit Perancang Ekonomi. Penyenaraian semula dalam perancangan projek Rancangan Malaysia Ke-12 akan dibuat setelah isu tanah diselesaikan. Ia bagi memenuhi aspirasi dan harapan penduduk sekitar dalam menjaga keamanan serta keselamatan setempat.

Tuan Yang Di-pertua,

Untuk makluman, Balai Polis Bekenu terletak di bawah kawalan Ibu Pejabat Polis Daerah Miri. Semua penugasan berkaitan trafik adalah di bawah kawalan Ketua Polis Daerah dengan dibantu oleh Ketua Bahagian Siasatan dan Penguatkuasaan Trafik Daerah bersama 3 orang pegawai kanan dan 54 anggota pangkat rendah yang berpusat Bahagian Trafik Ibu Pejabat Polis Daerah Miri. Kekuatan sedia ada ini akan digunakan untuk menjalankan tugas-tugas penguatkuasaan, penyiasatan dan kawalan lalu lintas meliputi daerah Miri.

Sehubungan itu, Kementerian akan sentiasa mengkaji kesesuaian perwujudan unit trafik tersebut pada masa akan datang.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KE TIGA, PENGGAL KE TIGA,
PARLIMEN KEEMPATBELAS**

PERTANYAAN : JAWAB LISAN

DARIPADA : DATUK MOHAMADDIN BIN KETAPI (LAHAD DATU)

TARIKH : 15 DISEMBER 2020 (SELASA)

SOALAN

DATUK MOHAMADDIN BIN KETAPI [LAHAD DATU] minta **MENTERI DALAM NEGERI** menyatakan sejauh manakah kepatuhan kepada SOP COVID-19 oleh pihak Jabatan Penjara sehingga berlakunya kluster Benteng LD Sabah.

JAWAPAN

Tuan Yang Di Pertua,

Untuk makluman Ahli Yang Berhormat, penularan COVID-19 di Penjara Tawau berpunca daripada kemasukan seorang banduan bukan warganegara dari IPD Lahad Datu yang tidak dibuat saringan COVID-19 terlebih dahulu dan hanya diambil tindakan untuk saringan oleh Jabatan Penjara Malaysia setelah banduan berkenaan dimasukkan ke penjara berkenaan. Setelah keputusan saringan positif diterima untuk banduan tersebut, saringan terhadap banduan-banduan lain di blok kuarantin Penjara Tawau turut dibuat dan dari masa ke semasa dan jumlah banduan dengan keputusan positif COVID-19 terus meningkat. Pada 24 Oktober 2020 hasil kerjasama dengan Kementerian Kesihatan Malaysia (KKM), tiada lagi banduan, anggota dan keluarga anggota yang aktif COVID-19.

SOALAN NO : 37

Jabatan Penjara Malaysia juga telah mengarahkan agar semua institusi penjara mematuhi prosedur operasi standard (SOP) yang telah dikeluarkan oleh KKM berhubung keperluan pelaksanaan ujian *swab* kepada anggota dan ahli keluarga anggota serta banduan, yang mempunyai kontak rapat dengan individu yang positif COVID-19 selaras dengan arahan yang telah dikeluarkan oleh Majlis Keselamatan Negara (MKN).

Pada 15 Oktober 2020, Sidang Khas MKN COVID-19 bil. 29 tahun 2020 telah bersetuju agar KKM melaksanakan ujian pengesahan COVID-19 kepada semua banduan semasa kemasukan bagi memastikan penularan COVID-19 di penjara dapat dicegah sepenuhnya. Melalui arahan tersebut, institusi-institusi penjara seluruh Malaysia telah diarahkan untuk memastikan semua banduan baharu mesti menjalani saringan COVID-19 dan mempunyai keputusan saringan tersebut sebelum ditempatkan di blok kuarantin penjara atau di hospital atau di pusat-pusat kuarantin di luar penjara.

Seterusnya bagi mengurangkan tahap kebolehjangkitan COVID-19 di kalangan banduan serta mengurangkan kesesakan, Jabatan Penjara Malaysia bersama dengan KDN sedang dalam proses memuktamadkan cadangan penempatan banduan sabitan dan reman kategori risiko keselamatan minimum di beberapa bekas kem Pusat Latihan Khidmat Negara (PLKN) yang akan diwartakan sebagai penjara sementara di bawah seksyen 8 Akta Penjara 1995 dan berfungsi sebagai *admission prison*.

Bagi tujuan yang sama iaitu mengurangkan tahap kebolehjangkitan, Jabatan Penjara Malaysia telah mewujudkan pusat-pusat transit di institusi penjara untuk penempatan banduan yang boleh diterima masuk ke institusi tersebut dengan mengambil kira keperluan pengasingan berdasarkan tarikh-tarikh kemasukan. Selaras dengan hala tuju Jabatan Penjara Malaysia iaitu dua pertiga banduan sabitan yang layak akan menjalani pemulihan di luar penjara, langkah-langkah pengurangan kesesakan melalui pelaksanaan dan pemerkasaan sistem parol, perintah kehadiran wajib, program integrasi penghuni industri, program *corporate smart internship* dan pelepasan banduan secara lesen. Ini akan dilaksanakan berterusan dengan itu dapat menjangka akan mengurangkan kesesakan dan juga kita dapat mengekang penularan wabak COVID-19 di dalam penjara.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KE-14**

PERTANYAAN : LISAN

DARIPADA : TUAN PANG HOK LIONG [LABIS]

TARIKH : 15 DISEMBER 2020 (SELASA)

SOALAN

TUAN PANG HOK LIONG [LABIS] minta **MENTERI KEWANGAN** menyatakan sama ada Kementerian Kewangan bercadang untuk menurunkan Kadar Dasar Semalaman (*Overnight Policy Rate or OPR*) kepada paras 1.25% untuk menyokong persekitaran ekonomi dan mempercepatkan kadar pemulihan ekonomi negara. Kalau tidak, kenapa tidak.

JAWAPAN

Tuan Yang Di-Pertua,

1. Penetapan Kadar Dasar Semalaman (Overnight Policy Rate, OPR) adalah diputuskan oleh Jawatan Kuasa Dasar Monetari (Monetary Policy Committee, MPC). Keputusan ini dibuat berdasarkan prospek keadaan ekonomi Malaysia.

2. Secara keseluruhan, OPR telah diturunkan sebanyak 125 mata asas pada tahun 2020 daripada 3.00% kepada 1.75% untuk menyokong persekitaran ekonomi yang tidak menentu dan mempercepat kadar pemulihan ekonomi. Penurunan OPR ini membantu dalam meringankan beban membayar hutang, mengurangkan jumlah kos pinjaman dan seterusnya mengurangkan kekangan aliran tunai bagi isi rumah, perusahaan kecil dan sederhana (PKS) dan syarikat korporat.

3. Pelarasan OPR ini menyokong langkah-langkah monetari dan kewangan lain yang diambil oleh Bank Negara Malaysia (BNM). Langkah-langkah ini termasuk:-

- a. Pelanjutan moratorium secara bersasar serta fleksibiliti bayaran balik pinjaman bagi mengurangkan obligasi pinjaman bulanan untuk isi rumah dan perniagaan. Pendekatan bersasar ini akan memastikan lebih banyak sumber tersedia untuk membantu mereka yang mudah terjejas. Pendekatan ini juga membolehkan sektor perbankan menyokong ekonomi secara lebih meluas melalui pemberian pinjaman yang berterusan.
- b. Peruntukan sebanyak RM18.1 billion (setakat bulan Ogos 2020, Disember 2019: RM9.1 billion) disediakan untuk membantu PKS menerusi dana khusus di bawah Tabung BNM untuk PKS, termasuk penubuhan Kemudahan Bantuan Khas (*Special Relief Facility, SRF*) yang direka bentuk bagi membantu mengatasi masalah aliran tunai jangka pendek yang dihadapi PKS yang terjejas oleh COVID-19 yang telah digunakan sepenuhnya. PKS masih boleh mengakses dana pada kadar yang lebih rendah

daripada kadar pasaran melalui kemudahan lain seperti Kemudahan Semua Sektor Ekonomi (*All Economic Sectors, AES*), Kemudahan Automasi dan Digital (*Automation and Digitalisation Facility, ADF*) dan Kemudahan Agromakanan (*Agrofood Facility, AF*).

4. Berdasarkan prospek pertumbuhan ekonomi dan inflasi pada masa ini, MPC dalam kenyataan dasar moneterinya menyifatkan pendirian dasar monetari adalah wajar dan akomodatif.

5. Melangkah ke hadapan, MPC akan terus menilai keadaan yang sentiasa berubah-ubah dan implikasinya terhadap prospek inflasi dan pertumbuhan dalam negeri secara keseluruhan.

Tuan Yang Di-Pertua,

6. Kerajaan terus komited untuk menggunakan alat-alat dasar yang bersesuaian bagi mewujudkan persekitaran kondusif yang menyokong pemulihan ekonomi yang berterusan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

DARIPADA : TUAN WONG HON WAI [BUKIT BENDERA]

TARIKH : 15 DISEMBER 2020 [SELASA]

SOALAN

Minta **MENTERI PERUMAHAN DAN KERAJAAN TEMPATAN** menyatakan apakah fungsi **Penggerak Komuniti Tempatan (PeKT)** dan berapa jumlah pelantikan, jumlah peruntukan pengurusan dan peruntukan program Penggerak Komuniti yang dilancarkan baru-baru ini dan berapa gaji/elaun yang diberikan terhadap setiap pelantikan tersebut.

JAWAPAN

Tuan Yang di-Pertua,

1. Untuk makluman Yang Berhormat, pelaksanaan Penggerak Komuniti Tempatan (PeKT) ketika ini baru melibatkan Selangor, Pulau Pinang dan Negeri Sembilan yang merangkumi kawasan dari 46 buah Pihak Berkuasa Tempatan (PBT). Fungsi PeKT adalah seperti berikut:

- a. menyampaikan maklumat kepada penduduk setempat berhubung dasar dan inisiatif di bawah Kementerian Perumahan dan Kerajaan Tempatan (KPKT);

- b. mewujudkan komuniti yang bersatu padu dan berdaya saing melalui aktiviti-aktiviti kesejahteraan bandar dan seterusnya memperkasakan komuniti dan generasi yang lebih mampan;
- c. memantau dan membantu menggerakkan penglibatan komuniti dalam meningkatkan keharmonian komuniti setempat;
- d. menjalankan kegiatan khidmat nasihat bagi memelihara kebersihan, kesihatan dan alam sekitar di sesebuah komuniti; dan
- e. mendapatkan respon dan maklum balas awal komuniti setempat sebelum sesuatu projek atau program dilaksanakan.

2. Sehingga kini, jumlah **Penggerak Komuniti Tempatan (PeKT)** yang telah dilantik adalah seramai 261 orang. Peruntukan yang disediakan untuk tahun 2020 adalah seperti jadual di bawah :

Peruntukan	Jumlah (RM)
Bayaran Pengurusan	1,880,000.00
Bayaran Program	783,020.00
Jumlah Besar	2,663,020.00

3. Setiap PeKT yang dilantik diluluskan bayaran pengurusan sebanyak RM2,000.00 sebulan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

DARIPADA : TUAN WONG TACK [BENTONG]

TARIKH : 15 DISEMBER 2020 (SELASA)

SOALAN

Minta **MENTERI SAINS, TEKNOLOGI DAN INOVASI** menyatakan memandangkan PDF Lynas akan diletakkan di bawah 'institutional control' selama 300 tahun, berapa kos pemantauan serta penyelenggaraan yang terlibat untuk jangka masa 300 tahun ini. Adakah Lynas akan menanggung kos ini dan bilakah ia akan dibayar sepenuhnya

JAWAPAN

Tuan Yang di-Pertua,

Tempoh Kawalan Institusi (*Institutional Control*) adalah berbeza bagi setiap pemasangan. Lembaga Perlesenan Tenaga Atom (AELB) akan membuat penilaian ke atas kemudahan pelupusan kekal (*Permanent Disposal Facility*, PDF) Lynas berdasarkan laporan Kajian Analisa Keselamatan (*Safety Assessment Report*, SAR) yang akan dilaksanakan sepanjang tempoh operasi kemudahan tersebut sebelum menentukan tempoh kawalan institusi yang bersesuaian.

Kos Kawalan Institusi meliputi kos permonitoran radiologi dan alam sekitar serta penyelenggaraan kemudahan pelupusan yang ditetapkan melalui syarat lesen di bawah Akta 304. Kos ini akan ditanggung sepenuhnya oleh pemegang lesen.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : JAWAB LISAN

DARIPADA : TUAN TEH KOK LIM [TAIPING]

TARIKH : 15 DISEMBER 2020 (SELASA)

SOALAN

TUAN TEH KOK LIM [TAIPING] minta **MENTERI KOMUNIKASI DAN MULTIMEDIA** menyatakan rancangan/usaha pihak Kementerian menangani masalah akaun palsu dalam media sosial yang menimbulkan isu-isu dalam masyarakat kita.

JAWAPAN

Tuan Yang di-Pertua,

Untuk makluman Ahli Yang Berhormat, tindakan yang dijalankan bagi menangani kewujudan akaun palsu di media sosial adalah melalui kolaborasi dan kerjasama dengan penyedia platform media sosial seperti *Facebook*, *Google* dan *Twitter* terutamanya dalam usaha menurun atau memadamkan kandungan yang menyalahi undang-undang Malaysia, selari dengan terma perkhidmatan serta piawaian komuniti pihak penyedia platform-platform berkenaan yang berpangkalan di luar negara.

Tindakan yang dijalankan oleh pihak Suruhanjaya Komunikasi dan Multimedia Malaysia (SKMM) adalah lebih berupa kepada rundingan dan permohonan kerjasama bagi mengambil tindakan sewajarnya termasuklah menyahaktifkan akaun palsu yang boleh melanggar terma dan syarat perkhidmatan serta piawaian komuniti penyedia platform.

Antara tahun 2019 sehingga September 2020, sejumlah **3,585** akaun-akaun yang menyamar telah disusuli tindakan oleh pihak SKMM. Daripada jumlah tersebut, 80% daripadanya telah dipadam dengan kerjasama pihak penyedia platform media sosial, selaras dengan terma-terma dan syarat platform masing-masing.

Selain maklumat daripada SKMM dan pengguna, pihak penyedia platform media sosial seperti *Facebook* juga turut memantau kandungan serta akaun yang terdapat di platform mereka, dan akan mengambil tindakan sewajarnya sekiranya kandungan atau akaun yang dimuatnaik bertentangan dengan terma dan syarat serta piawaian komuniti yang ditetapkan oleh pihak mereka.

Di pihak penyedia platform media sosial seperti *Facebook* dan *Twitter*, terdapat teknologi seperti *Artificial Intelligence* (AI) yang telah pun digunapakai bagi mengenalpasti akaun-akaun palsu di laman sosial kendalian mereka. Sebagai contoh, dari tahun 2018 sehingga suku kedua tahun 2020, *Facebook* dilaporkan secara proaktif telah menyahaktifkan lebih **13.037 bilion** akaun palsu secara global, yang mana 99.6% daripadanya dilaksanakan sebelum sebarang laporan dibuat oleh pengguna.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KE-14**

PERTANYAAN : LISAN

**DARIPADA : DATUK SERI SAIFUDDIN NASUTION
BIN ISMAIL [KULIM-BANDAR BHARU]**

TARIKH : 15 DISEMBER 2020 (SELASA)

SOALAN

DATUK SERI SAIFUDDIN NASUTION BIN ISMAIL [KULIM-BANDAR BHARU] minta **MENTERI KEWANGAN** menyatakan strategi Kerajaan mengurangkan defisit semasa sekarang.

JAWAPAN

Tuan Yang di-Pertua,

1. Penularan pandemik COVID-19 dan pengenalan pakej rangsangan dan pelan pemulihan ekonomi dijangka memberi kesan berbeza kepada kedudukan kewangan Kerajaan Persekutuan untuk jangka pendek dan jangka masa sederhana. Pada tahun ini, kutipan hasil Kerajaan Persekutuan telah disemak semula lebih rendah setelah mengambil kira peningkatan perbelanjaan bagi melaksanakan pakej rangsangan dan pelan pemulihan ekonomi. Defisit fiskal pada tahun 2020 juga telah disemak semula dan dianggarkan meningkat daripada 3.2% kepada 6.0% berbanding KDNK.

2. Walau bagaimanapun, semua langkah yang telah diumumkan dalam pakej rangsangan dan pemulihan ekonomi adalah berjangka masa pendek dan tidak akan terus membebankan kewangan Kerajaan Persekutuan dalam jangka masa sederhana dan panjang. Ini berikutan strategi Kerajaan bagi mengurangkan defisit fiskal dalam jangka masa sederhana secara berperingkat seterusnya memastikan kedudukan fiskal dan hutang negara kekal pada paras terkawal. Kerajaan juga menjangkakan pakej rangsangan dan pelan pemulihan ekonomi yang

telah dilaksanakan akan menghasilkan pulangan positif kepada ekonomi negara.

3. Tahun 2021 merupakan tempoh peralihan krisis ke fasa pemulihan yang akan ditumpukan kepada pelaksanaan beberapa langkah pemulihan untuk merancakkan semula ekonomi, melindungi kesejahteraan rakyat dan menyokong aktiviti perniagaan. Sehubungan itu, defisit fiskal diunjur lebih rendah kepada 5.4% daripada KDNK pada 2021. Tumpuan juga akan diberikan kepada usaha untuk meningkatkan kutipan hasil dan kecekapan perbelanjaan bagi mengukuhkan lagi kedudukan kewangan Kerajaan tanpa menjejaskan momentum pemulihan ekonomi dan agenda pembangunan jangka masa panjang.

4. Pada masa ini, Kerajaan mengguna pakai Kerangka Fiskal Jangka Sederhana atau *Medium Term Fiscal Framework (MTFF)* sebagai panduan dalam menggubal strategi ke arah konsolidasi fiskal untuk jangka sederhana (3 hingga 5 tahun) yang selari dengan pelan pembangunan Rancangan Malaysia lima tahun. Selain itu, Kerajaan juga dalam proses merangka Akta Tanggungjawab Fiskal (FRA) selain membangunkan Strategi Hasil Jangka Sederhana (MTRS) untuk memastikan pengurusan fiskal dan hutang adalah lebih baik dan telus.

Sekian, terima kasih.

PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS

PERTANYAAN : LISAN

DARIPADA : PUAN YEO BEE YIN [BAKRI]

TARIKH : 15 DISEMBER 2020 (SELASA)

SOALAN

PUAN YEO BEE YIN [BAKRI] minta **MENTERI ALAM SEKITAR DAN AIR** menyatakan perkembangan terkini rundingan perjanjian konsesi dengan Pakar Scieno TW untuk Environmental Quality Monitoring Program (EQMP). Adakah tambahan nilai diperolehi daripada perkhidmatan sedia ada.

JAWAPAN

Tuan Yang di-Pertua,

Untuk makluman Ahli Yang Berhormat,

1. Kementerian Alam Sekitar dan Air ingin memaklumkan bahawa Perjanjian Konsesi dengan Pakar Scieno TW **telah disemak** oleh Jabatan Peguam Negara dan juga satu Jawatankuasa Khas Majlis Kualiti Alam Sekeliling pada tahun 2019 semasa YB menjadi Menteri Tenaga, Sains, Teknologi, Alam Sekitar dan Perubahan Iklim (MESTECC) dan laporan mendapati perjanjian konsesi ini adalah teratur.
2. Mengambil kira isu pengurusan alam sekitar adalah dinamik serta perkembangan dan keperluan semasa, Kementerian Alam Sekitar dan Air (KASA) **sedang mengkaji rasionalisasi** Program Pengawasan Kualiti Alam Sekitar (*Environmental Quality Monitoring Program* - EQMP) bagi memberikan **nilai tambah kepada program ini tanpa penambahan kos kepada Kerajaan**. Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KE-14**

PERTANYAAN : LISAN

DARIPADA : TUAN LOKE SIEW FOOK [SEREMBAN]

TARIKH : 15 DISEMBER 2020 (SELASA)

SOALAN

TUAN LOKE SIEW FOOK [SEREMBAN] minta **MENTERI KEWANGAN** menyatakan semua projek dan perolehan yang dianugerahkan oleh Kementerian Pengangkutan secara rundingan terus dari 1 Mac 2020 sehingga 31 Oktober 2020.

JAWAPAN

Tuan Yang Di Pertua,

1. Untuk makluman Yang Berhormat, Perolehan Kerajaan dilaksanakan berdasarkan prinsip perolehan Kerajaan iaitu persaingan terbuka, akauntabiliti awam, ketelusan, nilai faedah terbaik serta adil dan saksama seperti yang digariskan oleh peraturan dan tatacara di dalam Arahkan Perbendaharaan dan Pekeliling Perbendaharaan. Walau bagaimanapun, Kerajaan membenarkan pelaksanaan perolehan secara rundingan terus berdasarkan Garis Panduan Permohonan Perolehan Secara Rundingan Terus yang menetapkan permohonan hanya boleh dikemukakan berasaskan lima (5) kriteria khusus seperti berikut:-

- i. Kesegeraan atas kepentingan awam di mana sekiranya tidak dilaksanakan segera akan memberi impak negatif kepada penyampaian perkhidmatan awam;
- ii. Bagi maksud penyeragaman untuk memastikan kesesuaian penggunaan (*compatibility*) antara barangan sedia ada dengan barangan baru yang akan dibeli;
- iii. satu punca bekalan/perkhidmatan yang mana hanya satu syarikat sahaja boleh membekalkan barangan/perkhidmatan yang dikehendaki;
- iv. melibatkan keselamatan/strategik bagi pembelian alat keselamatan atau projek strategik yang perlu dirahsiakan demi kepentingan negara; atau
- v. kontrak dengan syarikat pembuat Bumiputera yang memenuhi semua syarat kelayakan demi memupuk pertumbuhan syarikat Bumiputera yang bertaraf pembuat.

2. Sejak diperkenalkan mulai tahun 2015, penambahbaikan berterusan telah dilaksanakan terhadap garis panduan ini bagi memastikan ia kekal relevan. Antara penambahbaikan terkini yang telah dilaksanakan mulai tahun 2019 adalah dengan mewajibkan Kementerian/Agensi untuk melaksanakan penilaian terhadap syarikat yang dicadangkan. Ini bagi memastikan hanya syarikat yang benar-benar berkeupayaan dari segi kewangan dan teknikal dipertimbangkan untuk perolehan secara rundingan terus.

3. Sebagai langkah kawalan, Kementerian/Agensi perlu mengemukakan permohonan perolehan secara rundingan terus berdasarkan kriteria di atas kepada Kementerian Kewangan untuk pertimbangan dan kelulusan sebelum perolehan boleh dilaksanakan.

4. Selain itu, peraturan perolehan Kerajaan juga diperkemaskan melalui surat arahan Kementerian Kewangan bertarikh 29 Jun 2018 yang memansuhkan kaedah perolehan secara tender terhad yang mana dasar ini masih berkuat kuasa sehingga sekarang

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPATBELAS**

PERTANYAAN : JAWAB LISAN

**DARIPADA : YB DATO' DR. XAVIER JAYAKUMAR A/L
ARULANANDRAM (KUALA LANGAT)**

TARIKH : 15 DISEMBER 2020 (SELASA)

SOALAN

DATO' DR. XAVIER JAYAKUMAR A/L ARULANANDRAM [KUALA LANGAT] minta **MENTERI DALAM NEGERI** menyatakan apakah bilangan orang yang lahir di Malaysia tetapi mempunyai Kad Pengenalan Merah (Pemastautin Tetap) di Negara kita, dan berapa bilangan permohonan untuk ditukar ke Kad Pengenalan Biru yang telah diluluskan untuk tahun ini.

JAWAPAN

Tuan Yang Di-Pertua,

Kelahiran di Malaysia tidak menyebabkan seseorang individu memperoleh kewarganegaraan Malaysia secara automatik. Kewarganegaraan seseorang individu ditentukan berdasarkan kepada status perkahwinan dan taraf kewarganegaraan ibu bapa kandung sewaktu kelahiran berlaku. Untuk makluman Ahli Yang Berhormat, pengeluaran Kad Pengenalan Pemastautin Tetap (MyPR) oleh Jabatan Pendaftaran Negara (JPN) adalah berdasarkan Subperaturan 5(3)(b), Peraturan-Peraturan Pendaftaran Negara 1990. Bagi mendapatkan MyPR, pemohon perlu mempunyai pasport yang sah dan mempunyai Permit Masuk yang dikeluarkan oleh Jabatan Imigresen Malaysia (JIM).

Justeru itu, individu yang memegang MyPR tidak berkelayakan untuk menukar terus kepada Kad Pengenalan Warganegara Malaysia (MyKad) kerana mereka hendaklah terlebih dahulu mengemukakan

SOALAN NO : 45

permohonan kewarganegaraan sama ada di bawah Perkara 15(1) atau Perkara 16 atau Perkara 19 Perlembagaan Persekutuan, tertakluk kepada pematuhan syarat dalam Bahagian III Perlembagaan Persekutuan, Kaedah-Kaedah Kewarganegaraan 1964 [L.N.82/1964] serta perundangan berkaitan yang berkuatkuasa dalam isu pendaftaran perkahwinan, pengangkatan, kesahtarafan anak, dan peraturan imigresen.

Berdasarkan rekod JPN dari tahun 2015 hingga 15 Oktober 2020, sebanyak 34,376 permohonan kewarganegaraan daripada pemegang MyPR di bawah Perkara 15(1), Perkara 16, dan Perkara 19 Perlembagaan Persekutuan telah diterima. Daripada jumlah permohonan berkenaan, sebanyak 9,747 permohonan telah siap diproses dan diluluskan.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

DARIPADA : PUAN NOR AZRINA BINTI SURIP [MERBOK]

TARIKH : 15 DISEMBER 2020 [SELASA]

SOALAN

Minta **MENTERI PERUMAHAN DAN KERAJAAN TEMPATAN** menyatakan sejauh manakah keberkesanan langkah pengasingan sisa di punca (*segregation at source*) sejak dikuatkuasakan dan impaknya terhadap peningkatan jumlah sisa pepejal yang dibawa ke tapak pelupusan.

JAWAPAN

Tuan Yang di-Pertua,

1. Untuk makluman Yang Berhormat, pelaksanaan Pengasingan Sisa Pepejal di Punca (*Separation at Source* - SAS) telah diperkenalkan sejak 1 September 2015 dan dikuatkuasakan mulai 1 Jun 2016 di negeri-negeri yang menerima pakai Akta Pengurusan Sisa Pepejal dan Pembersihan Awam 2007 (Akta 672) iaitu Wilayah Persekutuan Kuala Lumpur dan Putrajaya, Johor, Melaka, Negeri Sembilan, Pahang, Kedah dan Perlis.
2. Secara umumnya, masyarakat memberi sokongan dan sambutan yang positif terhadap inisiatif ini. Hal ini dapat dilihat dengan jumlah kutipan sisa kitar semula dari rumah ke rumah sebanyak 10,857.73 tan

sejak ia dilaksanakan bermula 1 September 2015 sehingga Ogos 2020. Ini bermakna sebanyak 10 ribu tan sisa kitar semula telah berjaya diselamatkan daripada dilupuskan terus di tapak pelupusan.

3. Hasil daripada program ini dan kempen kesedaran yang telah dijalankan, kadar kitar semula negara telah meningkat setiap tahun mulai 2015 daripada 15.7% hingga 28.06% pada tahun 2019.

TAHUN	KADAR KITAR SEMULA NEGARA
2015	15.7%
2016	17.5%
2017	21%
2018	24.6%
2019	28.06%

4. Pencapaian ini adalah sejajar dengan sasaran kadar kitar semula negara pada tahun 2020 sebanyak 30%, yang kini telah menunjukkan peningkatan sebanyak 30.67%. Justeru itu, kerajaan telah menetapkan sasaran kadar kitar semula negara sebanyak 40% menjelang tahun 2025.

5. Kejayaan ini disumbang oleh pemeraksanaan program dan kempen yang telah dilaksanakan secara berterusan di mana masyarakat diberikan maklumat yang jelas berhubung penguatkuasaan ini. Antara inisiatif-inisiatif yang telah dijalankan untuk menggalakkan rakyat Malaysia mengasingkan sisa pepejal bagi tempoh 1 Januari 2016 sehingga 31 Ogos 2020 ialah ceramah dan pameran; Program Bank Kitar Semula (Tadika); Program Kitar Semula di Sekolah (Sekolah Rendah dan Sekolah Menengah); Program 3R di kawasan kediaman; Program 3R di Jabatan Kerajaan; Program 3R di Institut Pengajian Tinggi dan Program 3R di Industri dan pelaksanaan promosi dan hebahan yang telah dijalankan melibatkan media elektronik, media cetak dan media sosial secara berterusan.

6. Selain daripada program dan kempen di atas, penguatkuasaan SAS ini dilaksanakan di 1,831,681 premis bertanah dan 664,264 premis bertingkat yang meliputi 53 kawasan operasi Pihak Berkuasa Tempatan (PBT). Dari 1 Jun 2016 sehingga 31 Ogos 2020, sebanyak 758,242 buah premis bertanah telah diperiksa. Daripada jumlah tersebut, sebanyak 603 Notis Pemberitahuan Kesalahan (NPK) telah dikeluarkan kepada individu atau premis yang gagal melaksanakan SAS dan sebanyak 263 Izin Kompaun telah diperolehi daripada Timbalan Pendakwaraya. Baki selebihnya masih di peringkat melengkapkan siasatan bagi mendapatkan Izin Kompaun.

7. Justeru, kementerian yakin melalui komitmen yang ditunjukkan oleh segenap masyarakat melalui pembudayaan Pengasingan Sisa Pepejal di Punca ini akan dapat mengurangkan jumlah sisa pepejal yang dihantar ke tapak pelupusan; mengelakkan pembuangan bahan yang boleh dikitar semula; memanjangkan jangka hayat sesebuah tapak pelupusan; mentranformasikan minda masyarakat ke arah amalan hidup yang lestari dan hijau; dan seterusnya dapat mengurangkan peruntukan wang negara untuk proses pelupusan sisa pepejal secara keseluruhannya.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KE-14**

PERTANYAAN : LISAN

**DARIPADA : TUAN P. PRABAKARAN A/L
PARAMESWARAN [BATU]**

TARIKH : 15 DISEMBER 2020 (SELASA)

SOALAN

TUAN P. PRABAKARAN A/L PARAMESWARAN [BATU] minta **MENTERI KEWANGAN** menyatakan apakah kementerian berhasrat untuk melaksanakan moratorium fasa 2 bagi membantu peminjam yang terkesan akibat wabak pandemik yang mengakibatkan sektor ekonomi merundum? Jika tidak, apakah tindakan yang akan diambil bagi membantu menangani masalah ekonomi rakyat?

JAWAPAN

Tuan Yang Di-Pertua,

1. Seajar dengan pembukaan semula hampir keseluruhan sektor ekonomi dan seperti yang telah diumumkan dalam Belanjawan 2021, kecuali bagi PKS yang mempunyai pinjaman tidak melebihi RM150,000 dan kumpulan B40, moratorium kini dilaksanakan secara bersasar kepada golongan yang terjejas sepanjang tahun 2020 sehingga tahun 2021.

2. Bagi membantu menangani masalah ekonomi rakyat, beberapa inisiatif khusus yang bertujuan untuk membantu mengurangkan beban tekanan kewangan isi rumah telah diperkenalkan seperti berikut:-

- i. Pemberian tunai *one-off* melalui tambahan RM100 bagi Bantuan Sara Hidup (BSH) dan pelaksanaan pemberian tunai *one-off* Bantuan Prihatin Nasional (BPN) yang pertama kali mensasarkan bayaran bantuan kepada golongan M40 di samping golongan B40. Kerajaan kemudiannya membuat keputusan dengan meneruskan bantuan pemberian tunai ini melalui Bantuan Prihatin Nasional 2.0 (BPN 2.0).
- ii. Bantuan tunai kepada golongan mudah terjejas meliputi Orang Kurang Upaya, ibu tunggal serta sukarelawan Khidmat Bantu di Rumah.
- iii. Bantuan tunai turut disalurkan kepada golongan pemandu teksi, pemandu pelancong dan pemandu *e-hailing* serta bantuan khas kepada pelajar di Institusi Pengajian Tinggi (IPT). Kesemua bantuan ini merupakan inisiatif berbentuk *one-off* yang bertujuan membantu rakyat dalam tempoh jangka masa pendek.

3. Kerajaan turut mengurangkan bebanan rakyat yang mempunyai keperluan kesihatan melalui Skim Peduli Kesihatan untuk Kumpulan B40 (PEKA B40) yang dikawal selia oleh Kementerian Kesihatan Malaysia.

4. Selain itu, pemberian diskaun bil elektrik yang mana para pengguna domestik akan memperoleh diskaun bermula dari dua hingga 50 peratus berdasarkan jumlah penggunaan elektrik bulanan. Di samping itu, Kerajaan turut memperkenalkan subsidi tambang pengangkutan awam MY30 dalam menggalakkan mobiliti dan mengurangkan beban kos pengangkutan melalui pas perjalanan bulanan tanpa had di sekitar Lembah Klang kepada rakyat.

5. Dalam usaha mengurangkan bilangan rakyat yang terjejas dan peningkatan pada jumlah pengangguran, Kerajaan telah mengumumkan Program Subsidi Upah atau (PSU) yang merupakan bantuan kewangan untuk membantu majikan yang terkesan dari segi ekonomi akibat COVID-19 supaya dapat meneruskan operasi syarikat serta mengelakkan pekerja hilang pekerjaan dan punca pendapatan.

6. Kerajaan turut memperkenalkan Program Kemahiran dan Peningkatan Kemahiran bagi meningkatkan kebolehpasaran bagi golongan belia dan penganggur melalui program latihan yang disediakan dapat memanfaatkan hampir 200,000 belia dan penganggur. Beberapa Kementerian dan agensi telah dipertanggungjawab untuk melaksanakan program “*reskilling & upskilling*” dan menyediakan tenaga kerja yang dapat memenuhi kehendak industri.

Tuan Yang Di-Pertua,

7. Selain itu, terdapat pelbagai inisiatif tambahan telah diumumkan dalam Belanjawan 2021 pada 6 November yang lalu bagi membantu kewangan isi rumah yang masih terjejas akibat pandemik COVID-19 antaranya ialah:-

- i. Bantuan Prihatin Rakyat (BPR) merupakan bantuan kewangan sehingga RM1,800 kepada isi rumah yang layak;

- ii. Pelanjutan tempoh moratorium bagi golongan B40 atau pengurangan 50% bayaran pinjaman selama 6 bulan bagi yang layak;
 - iii. Pengurangan cukai pendapatan sebanyak 1% bagi pendapatan bercukai RM50,001-RM70,000;
 - iv. Pelanjutan inisiatif pas perjalanan tanpa had My30 bagi perkhidmatan bas dan rel dengan peruntukan sebanyak RM300 juta;
 - v. Pengurangan kadar caruman minimum KWSP pekerja dari 11% kepada 9% mulai Januari 2021 untuk tempoh 12 bulan;
 - vi. Pengeluaran simpanan KWSP Akaun 1 secara bersasar bagi ahli yang kehilangan pekerjaan dan pengurangan pendapatan. Bagi pencarum yang mempunyai kurang daripada RM100 ribu di Akaun 1, pengeluaran maximum adalah RM10 ribu dan bagi pencarum yang mempunyai lebih daripada RM100 ribu, pengeluaran maximum adalah sebanyak RM60 ribu.
8. Kerajaan komited dalam memastikan semua program yang sedang berlangsung dan yang telah dicadangkan bagi tahun 2021 akan dilaksanakan secara cekap dan berkesan melalui unit LAKSANA di bawah kementerian kewangan. Saya sendiri akan melaporkan kemajuan pelaksanaan inisiatif-inisiatif berkenaan setiap minggu.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPATBELAS**

PERTANYAAN : JAWAB LISAN

DARIPADA : YB TUAN CHONG CHIENG JEN (STAMPIN)

TARIKH : 15 DISEMBER 2020 (SELASA)

SOALAN

TUAN CHONG CHIENG JEN [STAMPIN] minta **MENTERI DALAM NEGERI** menyatakan berapa jumlah permohonan kewarganegaraan yang telah diluluskan untuk permohonan yang dikemukakan di negeri Sarawak dalam tahun 2019 dan 2020 dan berapakah masih belum diputuskan oleh Kementerian.

JAWAPAN

Tuan Yang Di-Pertua,

Berdasarkan rekod Jabatan Pendaftaran Negara (JPN) dari tahun 2019 hingga 15 Oktober 2020, sebanyak 571 permohonan kewarganegaraan di bawah semua Perkara Perlembagaan Persekutuan yang didaftarkan di negeri Sarawak telah diterima. Daripada jumlah permohonan berkenaan, sebanyak 536 permohonan diproses dan 222 permohonan telah diluluskan dan dikeluarkan dengan Sijil Kewarganegaraan.

Untuk makluman Ahli Yang Berhormat, pengeluaran Sijil Kewarganegaraan berkenaan meliputi permohonan yang telah diluluskan sebelum tahun 2019 tetapi dikeluarkan Sijil Kewarganegaraan dalam tempoh tahun 2019 hingga 2020. Para pemohon yang telah mendapat kelulusan perlu hadir di JPN bagi mengangkat sumpah selaras dengan Jadual Pertama Perlembagaan Persekutuan dan seterusnya membuat pembayaran fi sebelum dikeluarkan dengan Sijil Kewarganegaraan.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KE-14**

PERTANYAAN : LISAN

**DARIPADA : PUAN RUBIAH BINTI WANG
[KOTA SAMARAHAN]**

TARIKH : 15 DISEMBER 2020 (SELASA)

SOALAN

PUAN RUBIAH BINTI WANG [KOTA SAMARAHAN] minta **MENTERI KEWANGAN** menyatakan status terkini pelaksanaan UNIT LAKSANA dalam memastikan inisiatif di bawah Pakej Bantuan Prihatin Nasional (BPN) dan Pelan Jana Semula Ekonomi (PENJANA) bagi memastikan tiada sesiapa yang tertinggal.

JAWAPAN

Tuan Yang di-Pertua,

1. Untuk makluman Yang Berhormat, Kerajaan telah mengumumkan Pakej Ransangan Ekonomi yang terdiri daripada Pakej PRIHATIN, Pakej PRIHATIN Tambahan, Pelan PENJANA dan Pakej Kita Prihatin bernilai RM305 bilion yang merangkumi lebih daripada 80 inisiatif yang berteraskan rakyat, perniagaan dan ekonomi. Inisiatif ini dilaksanakan oleh pelbagai Kementerian, Agensi dan pihak swasta, dan sedang dalam pelbagai peringkat pelaksanaan.

2. Sehingga 30 November 2020, kemajuan perbelanjaan PRIHATIN adalah seperti berikut:-

- i. Sebanyak RM98.5 bilion atau 74.3% daripada RM132.3 bilion yang diperuntukkan bagi memenuhi matlamat pertama iaitu melindungi rakyat telah belanjakan;
- ii. Sebanyak RM53.26 bilion atau 43.99% daripada RM121 bilion yang diperuntukkan bagi memenuhi matlamat kedua iaitu menyokong perniagaan telah dibelanjakan; dan
- iii. Sebanyak RM4.55 bilion atau 67.49% daripada RM6.7 bilion yang diperuntukkan bagi memenuhi matlamat ketiga iaitu memperkukuh ekonomi telah dibelanjakan.

3. Sehingga 30 November 2020, kemajuan perbelanjaan PENJANA adalah seperti berikut:-

- i. Sebanyak RM7.36 bilion atau 56.0% daripada RM13.2 bilion yang diperuntukkan bagi memenuhi teras pertama iaitu memperkasa rakyat telah dibelanjakan;
- ii. Sebanyak RM5.63 bilion atau 37.66% daripada RM14.7 bilion yang diperuntukkan bagi memenuhi teras kedua iaitu melonjak perniagaan telah dibelanjakan; dan

- iii. Sebanyak RM2.02 bilion atau 26.78% daripada RM7.1 bilion yang diperuntukkan bagi memenuhi teras ketiga iaitu merangsang ekonomi telah dibelanjakan.
4. Sehingga 30 November 2020, kemajuan perbelanjaan bagi KITA PRIHATIN adalah seperti berikut:-
- i. Bagi Bantuan Prihatin Nasional 2.0, sebanyak RM4.8 bilion atau 68.6% daripada RM7.0 bilion telah dibelanjakan melibatkan seramai 10.5 juta penerima. Bayaran kedua dijangka pada Januari 2021;
 - ii. Bagi Program Subsidi Upah 2.0, sebanyak 39,203 majikan dan 307,420 pekerja telah menerima manfaat dimana sebanyak RM240 juta telah dibelanjakan; dan
 - iii. Bagi inisiatif Geran Khas Prihatin 2.0, penyaluran telah bermula pada 30 November 2020 dan pelaporan akan dibuat bermula pada laporan bulan hadapan.
5. Bagi memastikan supaya kesemua inisiatif sampai kepada golongan yang disasarkan secara cekap dan berkesan, maka pihak Kerajaan telah menubuhkan Unit Pelaksanaan dan Koordinasi Stimulus Ekonomi Antara Agensi Nasional (LAKSANA) di bawah Kementerian Kewangan. LAKSANA dengan kerjasama Kementerian / Agensi lain akan memantau secara rapat pelaksanaan inisiatif dan membuat intervensi awal kepada sebarang isu pelaksanaan yang timbul selain turut membuat pelaporan secara berkala dan berterusan kepada Kerajaan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KE-14**

PERTANYAAN : LISAN

DARIPADA : TUAN CHA KEE CHIN [RASAH]

TARIKH : 15 DISEMBER 2020 (SELASA)

SOALAN

TUAN CHA KEE CHIN [RASAH] minta **MENTERI KEWANGAN** menyatakan bagaimanakah mekanisme pengeluaran wang dari Akaun 1 KWSP di bawah program i-Sinar seperti mana yang diumumkan oleh YB Menteri ketika penggulangan pada 26 November, dan berapa jumlah pencarum yang layak serta had maksimum pengeluaran yang dibenarkan.

JAWAPAN

Yang di-Pertua,

1. Untuk makluman Ahli Yang Berhormat, sepertimana dimaklumkan semasa penggulangan Perbahasan Belanjawan 2021 pada 26 November 2020, Pengeluaran i-Sinar telah diperluaskan kepada ahli KWSP yang terjejas pendapatan mereka, tidak kira sama ada disebabkan kehilangan pekerjaan atau diberi cuti tanpa gaji, ataupun telah berkurang pendapatan mereka akibat krisis pandemik COVID-19.
2. Dengan perluasan kriteria ini, semua ahli KWSP yang terjejas pendapatan sama ada dalam sektor formal atau sektor tidak formal termasuk ahli yang sudah lama tidak mencarum, suri rumah, mereka yang bekerja sendiri dan yang bekerja di sektor ekonomi gig layak memohon i-Sinar. Dianggarkan bahawa jumlah ahli yang layak memohon adalah seramai 8.4 juta berbanding 2 juta ahli sebelum ini.

3. Ahli-ahli yang layak boleh dibahagikan kepada dua kategori. Bagi Kategori 1, KWSP akan menggunakan data dalaman tanpa memerlukan dokumen sokongan daripada ahli atau mana-mana pihak ketiga. Kriteria yang akan digunakan adalah:-

- i. Ahli yang tiada caruman dengan KWSP sekurang-kurangnya 2 bulan berturut-turut semasa permohonan; atau
- ii. Ahli yang telah mengalami pengurangan gaji pokok sebanyak 30% dan ke atas selepas 1 Mac 2020.

2. Kategori 2 pula adalah untuk ahli yang terjejas pendapatan sebanyak 30% dan ke atas (termasuk pengurangan gaji dan elaun atau pemotongan tuntutan kerja lebih masa dan kes-kes lain berdasarkan budi bicara KWSP) selepas 1 Mac 2020. Kategori ini akan melibatkan pengendalian khas di mana KWSP memerlukan dokumen sokongan terkini daripada ahli seperti berikut:

- i. Slip gaji sebelum dan selepas pengurangan pendapatan; dan
- ii. Notis cuti tanpa gaji, pemberhentian/ pemotongan elaun dan/ atau tuntutan kerja lebih masa; dan/ atau
- iii. Dokumen sokongan lain yang berkaitan seperti penyata bank.

4. Amaun yang layak dikeluarkan di bawah pengeluaran ini adalah seperti berikut:-

- i. Simpanan sehingga maksimum RM10 ribu, bagi ahli yang mempunyai simpanan RM100,000 dan ke bawah; atau
- ii. 10% daripada simpanan sehingga maksimum RM60,000 bagi ahli yang mempunyai simpanan melebihi RM100,000.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : JAWAB LISAN

DARIPADA : PUAN TEO NIE CHING [KULAI]

TARIKH : 15 DISEMBER 2020 (SELASA)

SOALAN

PUAN TEO NIE CHING [KULAI] minta **MENTERI KOMUNIKASI DAN MULTIMEDIA** menyatakan keberkesanan Akta Perlindungan Data Peribadi. Jumlah kes atau aduan, orang atau syarikat yang diambil tindakan sejak akta tersebut berkuatkuasa.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian telah menguatkuasakan Akta Perlindungan Data Peribadi 2010 (Akta 709) pada 15 November 2013 yang bertujuan untuk mengawalselia pemprosesan data peribadi individu yang terlibat dalam urusan niaga komersial oleh Pengguna Data supaya tidak disalahguna dan disalahpakai oleh pihak-pihak yang berkepentingan.

Setiap Pengguna Data wajib mematuhi 7 Prinsip Perlindungan Data Peribadi (Prinsip PDP) dalam mengendalikan data peribadi milik pelanggan mahu pun pekerja bagi memastikan data peribadi tersebut tidak disalahgunakan.

Berhubung dengan jumlah kes atau aduan yang telah diterima oleh Jabatan Perlindungan Data Peribadi (JPDP), bermula dari tahun 2015 sehingga 21 Oktober 2020, sebanyak 2,701 aduan telah diterima dengan pecahan mengikut tahun iaitu 2015 sebanyak 34 aduan, 2016 sebanyak 153 aduan, 2017 sebanyak 320, 2018 sebanyak 630, 2019 sebanyak 742 dan setakat 21 Oktober 2020, sebanyak 822 aduan.

JPDP telah mula melaksanakan tindakan pendakwaan dan pengkompaunan bagi siasatan yang melibatkan pelanggaran Akta 709 bermula pada tahun 2017. Sehingga 21 Oktober 2020, antara kes yang telah berjaya diselesaikan oleh JPDP adalah seperti berikut:

- (i) Lima (5) Orang Kena Saman (OKS) telah didakwa di Mahkamah dengan jumlah denda sebanyak RM54,000.00; dan
- (ii) Tujuh (7) Orang Kena Kompaun (OKK) telah dikompaun dengan jumlah kompaun sebanyak RM80,000.00.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KE-14**

PERTANYAAN : LISAN

**DARIPADA : PUAN KASTHURIRAANI A/P PATTO
[BATU KAWAN]**

TARIKH : 15 DISEMBER 2020 (SELASA)

SOALAN

PUAN KASTHURIRAANI A/P PATTO [BATU KAWAN] minta **MENTERI KEWANGAN** menyatakan senarai terperinci pecahan peruntukan dan perbelanjaan bagi setiap Kementerian dari bulan Januari 2020 sehingga kini mengikut peruntukan perbelanjaan pengurusan dan peruntukan perbelanjaan pembangunan, terutama sekali bagi bantuan COVID-19 dan penerima mengikut negeri dan agensi.

JAWAPAN

Tuan Yang di-Pertua,

1. Untuk makluman Yang Berhormat, jumlah perbelanjaan Kerajaan Persekutuan sehingga 30 Oktober 2020 adalah seperti berikut:-

- **Perbelanjaan Mengurus: RM208 bilion**
- **Perbelanjaan Pembangunan: RM50 bilion**
- **Perbelanjaan COVID-19: RM1.3 bilion**

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : JAWAB LISAN

**DARIPADA : TUAN NIK NAZMI BIN NIK AHMAD
[SETIAWANGSA]**

TARIKH : 15 DISEMBER 2020 (SELASA)

SOALAN

TUAN NIK NAZMI BIN NIK AHMAD [SETIAWANGSA] minta **MENTERI KOMUNIKASI DAN MULTIMEDIA** menyatakan status penubuhan Majlis Media Malaysia (Malaysian Media Council) memandangkan laporan telah disediakan oleh Jawatankuasa Protem Majlis Media Malaysia atas permintaan Kementerian Komunikasi dan Multimedia telah pun dihantar dan draf telah pun siap dirangka oleh Jawatankuasa Protem Majlis Media Malaysia

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Komunikasi dan Multimedia Malaysia telah pun menerima laporan *pro-tem committee* Majlis Media Malaysia (MMM) berkaitan Penubuhan Majlis Media Malaysia termasuk cadangan draf Rang Undang-Undang (RUU) pada 3 Ogos 2020 yang lalu. Kementerian ini juga mendapati bahawa *pro-tem committee* telah melaksanakan inisiatif sendiri dengan memuat naik dokumen-dokumen tersebut dalam laman sesawang majlismedia.my/mediacouncil.my untuk mendapatkan maklum balas daripada orang awam berhubung draf RUU MMM tersebut.

Kementerian ini telah membuat penelitian awal terhadap Draf RUU MMM yang telah diterima serta mengedarkannya kepada bahagian serta jabatan yang berkaitan di bawah Kementerian ini untuk mendapatkan maklum balas awal yang sewajarnya. Walau bagaimanapun, terdapat juga beberapa perkara di dalam draf RUU tersebut yang memerlukan penjelasan tambahan daripada *pro-tem committee*. Justeru, kesemua persoalan tersebut telah diajukan kepada *pro-tem committee* pada 21 Oktober 2020 bagi mendapatkan penjelasan tambahan seterusnya membolehkan penelitian lebih lanjut dibuat terhadap draf RUU tersebut dan tindakan susulan sewajarnya.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KE-14**

PERTANYAAN : LISAN

DARIPADA : PUAN TEO NIE CHING [KULAI]

TARIKH : 15 DISEMBER 2020 (SELASA)

SOALAN

PUAN TEO NIE CHING [KULAI] minta **MENTERI KEWANGAN** menyatakan butiran dan program/aktiviti bawah Bekalan 11, Anggaran Perbelanjaan Persekutuan 2021 di mana Sekolah Tahfiz, Sekolah Pondok Berdaftar dan Sekolah Agama Rakyat diperuntukkan RM100 juta. Sama ada peruntukan juga disediakan untuk Sekolah Menengah Persendirian Cina.

JAWAPAN

Tuan Yang di-Pertua,

1. Yang Berhormat, sebagaimana yang telah saya maklumkan dalam sidang dewan yang mulia ini, Kerajaan telah memperuntukkan sejumlah RM100 juta bagi tujuan penyelenggaraan Sekolah Tahfiz, Sekolah Pondok Berdaftar dan Sekolah Agama Rakyat. Peruntukan ini disediakan di bawah B.11 Perkhimatan Am Perbendaharaan di bawah butiran 021300 – Pemberian Kemudahan Projek Khas.
2. Untuk makluman Yang Berhormat, butiran B11 Pemberian Kemudahan Projek Khas yang disediakan RM922 juta, berdasarkan amalan digunakan untuk membiayai langkah tambahan yang diumumkan dalam ucapan Belanjawan 2021.
3. Antara langkah-langkah ucapan Belanjawan yang turut dibiayai di bawah peruntukan ini ialah keperluan tambahan RM120 juta bagi penambahbaikan Rancangan Makanan Tambahan untuk pelajar miskin, geran padanan untuk NGO dan social enterprise sebanyak RM100 juta terutamanya bagi program peningkatan pendapatan bagi golongan rentan, menangani isu sosial seperti penderaan kanak-kanak dan gelandangan, serta pelbagai langkah yang menyumbang kepada kesejahteraan rakyat termasuk peluasan subsidi pengangkutan awam bas, geran untuk taska, pusat aktiviti warga emas serta perkhidmatan ATM bergerak bagi pedalaman Sabah dan Sarawak.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KE-14**

PERTANYAAN : LISAN

DARIPADA : TUAN CHAN FOONG HIN [KOTA KINABALU]

TARIKH : 15 DISEMBER 2020 (SELASA)

SOALAN

TUAN CHAN FOONG HIN [KOTA KINABALU] minta **MENTERI KEWANGAN** menyatakan sama ada pengurusan Malaysia Airlines Berhad telah mendapatkan restu Kerajaan Persekutuan untuk mengumumkan penutupan sekiranya rundingan dengan syarikat pajakan kapal terbang berhubung rancangan penstrukturan semula gagal, sama ada Kerajaan Persekutuan akan melakukan '*bailout*' bagi menyelamatkan syarikat penerbangan kebangsaan tersebut.

JAWAPAN

1. Tuan Yang Dipertua, kesan COVID-19 terhadap industri penerbangan secara global adalah amat buruk dan Malaysia Airlines tidak terkecuali daripada menerima impak daripada penularan pandemik ini. Malaysia Airlines Berhad (MAB) kini beroperasi dengan kira-kira 75% daripada pesawatnya tidak dapat diterbangkan akibat sekatan perjalanan, dan turut menyaksikan kapasiti dan pendapatannya terjejas.
2. Prestasi kewangan Malaysia Aviation Group Berhad (MAGB) antara tahun 2015 hingga 2018 adalah seperti berikut:-

Tahun	Keuntungan/ (Kerugian) - RM
2015	(1.1b)
2016	(0.7b)
2017	(1.2b)
2018	(1.3 b)

3. Setakat 31 Ogos 2020, jumlah kecairan yang dimiliki oleh Kumpulan MAGB adalah kira-kira RM366 juta selain kira-kira RM578 juta yang tersedia untuk digunakan daripada dana yang diperuntukkan oleh Khazanah. Sehingga kini, Khazanah telah menyuntik kira-kira RM28 bilion ke dalam syarikat penerbangan tersebut manakala jumlah liabiliti MAGB pada masa ini yang akan disusun semula adalah dianggarkan sebanyak RM16 bilion.

4. Untuk makluman, Kerajaan komited untuk membantu semua pihak yang terjejas dengan penularan wabak COVID-19. Oleh itu, Kerajaan melalui Skim Jaminan Prihatin Danajamin (SJPD) menyediakan program pembiayaan bernilai RM50 bilion dengan jaminan sebanyak 80% ke atas pembiayaan bagi modal kerja syarikat. Namun demikian, kemudahan jaminan ini disediakan untuk manfaat kepada semua syarikat yang beroperasi di Malaysia dalam semua sektor termasuk sektor penerbangan dan pengangkutan udara tertakluk kepada syarat-syarat kelayakan yang telah ditetapkan.

5. Kerajaan tidak akan terlibat dalam sebarang pelan untuk menyelamatkan (*bail-out*) MAB. Walau bagaimanapun, bagi mengatasi masalah kewangan MAGB dan MAB, Kerajaan akan mengadakan rundingan lanjut dengan pihak Khazanah bagi mengenal pasti hala tuju syarikat khususnya dalam memperkukuhkan kedudukan kewangannya dan mengenal pasti penyelesaian strategik yang terbaik bagi kumpulan penerbangan tersebut.

6. Keputusan untuk menutup atau menghentikan operasi MAGB masih belum dilakukan dan bergantung kepada hasil rundingan MAGB dengan pihak pemiutang dan pemajak bagi menstruktur semula syarikat. Dalam masa yang sama, pihak pengurusan Khazanah juga akan melaksanakan usaha terbaik bagi memastikan kebajikan kakitangan kumpulan MAGB terpelihara termasuk, sekiranya perlu, bayaran pampasan yang setimpal yang mematuhi undang-undang pekerjaan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KE-14**

PERTANYAAN : LISAN

DARIPADA : TUAN WONG CHEN [SUBANG]

TARIKH : 15 DISEMBER 2020 (SELASA)

SOALAN

TUAN WONG CHEN [SUBANG] minta **MENTERI KEWANGAN** menyatakan kemas kini terkini rundingan 1MDB-IPIC dengan Abu Dhabi, termasuk sebarang jumlah dan jadual pembayaran yang dipersetujui, jika ada.

JAWAPAN

Tuan Yang di-Pertua,

1. Buat masa ini, Kerajaan sedang meneruskan tindakan undang-undang untuk membatalkan perjanjian penyelesaian antara 1MDB dan IPIC di Mahkamah di London, United Kingdom. Terdapat pelbagai prosiding interlokutori yang telah difailkan sama ada oleh Kerajaan Malaysia atau pihak IPIC/Aabar yang masing-masingnya sedang dicabar oleh pihak bertentangan.

2. Kerajaan sentiasa bersifat terbuka untuk mempertimbangkan apa-apa bentuk penyelesaian sekiranya terdapat tawaran yang sejajar dengan prinsip dan tanggungjawab Kerajaan Malaysia, iaitu untuk memastikan aset-aset negara dipulangkan dan dalam masa yang sama memastikan keadilan dapat ditegakkan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

DARIPADA : TUAN LIM GUAN ENG [BAGAN]

TARIKH : 15 DISEMBER 2020 [SELASA]

SOALAN

Minta **MENTERI PERUMAHAN DAN KERAJAAN TEMPATAN** menyatakan status peruntukan yang diberikan kepada kampung-kampung baru di mana RM85 juta telah pun diumumkan dalam Belanjawan 2020. Nyatakan jumlah kampung baharu dan kriteria lantikan pegawai kampung baharu.

JAWAPAN

Tuan Yang di-Pertua,

1. Untuk makluman Yang Berhormat, Kementerian Perumahan dan Kerajaan Tempatan (KPKT) telah memperuntukkan sejumlah RM60 juta bagi pembangunan Kampung Baru pada tahun 2020. Peruntukan pembangunan Kampung Baru ini menunjukkan komitmen Kerajaan dalam membangunkan dan meneruskan program-program pembangunan kemudahan infrastruktur dan komuniti di Kampung Baru. Pecahan peruntukan Program Pembangunan Kampung Baru adalah seperti berikut:

- (i) Program Pembangunan Infrastruktur sebanyak RM42 juta;
- (ii) Program Bantuan Baik Pulih Rumah sebanyak RM5 juta; dan
- (iii) Program Skim Pinjaman Khas Penduduk Kampung Baru sebanyak RM13 juta.

2. Daripada peruntukan sebanyak RM42 juta bagi Program Pembangunan Infrastruktur, sebanyak RM15.08 juta telah diluluskan untuk pelaksanaan 215 projek di Kampung-kampung Baru. Manakala bagi Program Bantuan Baik Pulih Rumah, peruntukan sebanyak RM1.67 juta telah diluluskan untuk membaik pulih 176 buah rumah. Bagi Program Skim Pinjaman Khas Penduduk Kampung Baru pula, kesemua RM13 juta telah disalurkan kepada Bank Simpanan Nasional.

3. Untuk makluman Yang Berhormat juga, jumlah Kampung Baru di seluruh negara adalah sebanyak 613 buah kampung yang meliputi Kampung Baru, Kampung Baru Rangkaian dan Kampung Bagan. Negeri Perak mempunyai bilangan kampung yang tertinggi iaitu sebanyak 158 buah kampung yang merangkumi 126 Kampung Baru, 17 buah Kampung Baru Rangkaian dan 15 buah Kampung Bagan.

4. Kriteria pelantikan Pegawai Kemajuan Perkampungan perlu mematuhi syarat-syarat utama seperti berikut:

- (a) Warganegara Malaysia;
- (b) Berumur tidak kurang daripada 18 tahun;
- (c) Memiliki Sijil Pelajaran Malaysia atau kelayakan yang diiktiraf setaraf dengannya; dan
- (d) Memiliki kepujian (sekurang-kurangnya Gred C) dalam subjek Bahasa Melayu pada peringkat Sijil Pelajaran Malaysia atau kelulusan yang diiktiraf setaraf dengannya.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KE-14**

PERTANYAAN : LISAN

DARIPADA : PUAN TEO NIE CHING [KULAI]

TARIKH : 15 DISEMBER 2020 (SELASA)

SOALAN

PUAN TEO NIE CHING [KULAI] minta **MENTERI KEWANGAN** menyatakan samada peruntukan disediakan untuk:-

- a) Sekolah Menengah Persendirian Cina;
- b) Kolej Universiti Southern;
- c) Kolej Universiti New Era; dan
- d) Kolej Universiti Komunikasi Han Chiang;

dalam Belanjawan 2021.

JAWAPAN

Tuan Yang di-Pertua,

Di bawah Belanjawan 2021, Kementerian Pendidikan Malaysia (KPM) telah disediakan peruntukan sebanyak RM800 juta untuk penyelenggaraan sekolah kerajaan dan sekolah bantuan kerajaan. Untuk tahun 2021, KPM akan menggunakan formula baharu untuk mengagihkan peruntukan tersebut mengikut jenis sekolah mengambil kira faktor bilangan sekolah dan keperluan. Sehubungan itu, tiada peruntukan khusus yang disediakan untuk sekolah menengah persendirian Cina atau kolej universiti persendirian.

Sekian, terima kasih.